



40
35
30
25
20
15

文庫 11
D 289
8

元書卷三十一

邵陽曾廉譔

博爾朮者勒蔑忽必來赤老溫博爾忽朮赤台畏答兒列傳第六
博爾朮一曰孛幹兒出阿兒刺氏元同姓也先世具始祖諸族傳
博爾朮父曰納忽阿兒蘭以與烈祖壤相接稱爲敦睦博爾朮志
氣雄毅方十餘歲太祖始有驕馬八爲宏吉刺別部要兒斤卒所
盜太祖獨追之途遇博爾朮卽奮然請與偕行厯三晝夜竟驅馬
還盜不敢爭也是時太祖赤手無徒侶被蔑里乞圍於不而罕山
惟博爾朮及者勒蔑與同患難太祖之追泰赤烏於斡難河兩軍
皆死戰博爾朮繫馬於腰鞬而引滿分寸不離故處泰赤烏卒以
敗亡後與克烈戰於哈蘭眞沙陀博爾朮馬中流矢斃乃奪克烈
馬以歸先是軍還而失博爾朮及是博爾朮至太祖乃嘆息曰天

贊我也博爾朮始與太祖俱年少慷慨相許義均同氣然博爾朮克嚴君臣之禮當太祖與塔塔兒戰於答闡捏木兒格思太祖倦而休息時正霖雨博爾朮披氈衫以蔽太祖自宵達旦足跡一移而已其忠謹如此太祖初年宿衛未備必博爾朮警夜太祖始安寢或語及政事至竟夕不寐太祖起自遐荒諸將多雄猛而少規畫惟博爾朮與木華黎能處大事入與謀議出蒞行陣又能盡忠補益善則贊之不善則止之故太祖尤重二人及卽大位遂以博爾朮爲右萬戶自斡難河源西至按台山博爾朮治焉詔並宥九死太祖嘗謂之曰汝與木華黎猶我車之有轅身之有臂也又與木華黎博爾忽赤老溫並號掇里班曲律言四傑也太祖因以爲四怯薛領怯薛歹分番宿衛命其子孫世襲察合台太子出王于闐命從博爾朮受教博爾朮告以人生經歷艱險必獲善地所遇

無輕舍止防奸宄也太祖善其言以老病薨元家開國功臣率先效命以成大業推博爾朮爲首子孛羅帶亦曰孛欒台襲萬戶大宗時賜廣平路沼水州一萬七千戶爲食邑大德五年贈博爾朮推忠協謀佐運功臣太師開府儀同三司廣平王諡忠武贈孛羅帶推誠宣力保順功臣太師開府儀同三司廣平王諡忠定孛羅帶與特木台駙馬幹闊烈闊里必爲右手萬戶三投下幹闊烈亦曰幹歌列亦曰幹歌連博爾朮從弟也太祖自札答刺分營以居火兒赤班七十人太祖卽大位增至千人仍幹闊烈領之太宗分封功臣幹闊烈得廣平路萬五千八百戶特木台得廣平路磁州九千四百戶世祖分江南地幹闊烈得全州灌陽萬六千七百戶特木台得全州九千八百戶皆以給其子孫世守焉孛羅帶子玉

昔帖木兒

玉昔帖木兒弱冠襲萬戶統接台部器量宏達世祖聞其賢驛召赴闕見其風骨龐厚解御服銀貂賜之復賜號爲月呂魯那顏故亦稱爲月呂魯焉元制自太祖以來重典內膳世祖特命領之侍宴內殿玉昔帖木兒起行酒詔諸王妃皆爲荅禮至元十二年拜御史大夫玉昔帖木兒遇事廷辨務舉憲職而言利之臣欲援金舊制併憲司入漕府當政者又請以郡府吏互照憲司檢底玉昔帖木兒以爲有傷監臨之體非設風憲以輯奸之意也由是議沮然是時阿合馬擅樞機輒以其親黨居行省每忌按察等司得發其私已請罷之玉昔帖木兒夜入帝臥內力陳其不可得不罷阿合馬百計欲壞臺綱玉昔帖木兒爭其大者小者弗爭也阿合馬既死二十二年阿合馬之黨荅卽古阿散欲危皇太子賴玉昔帖

木兒及丞相安童入見帝言狀事得解語在明孝太子傳居二歲乃顏大王反於東方帝親征而命玉昔帖木兒將蒙古軍前驅玉昔帖木兒及漢軍都元帥李庭敗乃顏於忽爾阿刺河又追敗之海刺兒河禽乃顏以獻詔選乘輿橐駝百蹄勞之玉昔帖木兒李庭進剿其餘黨獲塔不歹金家奴於夢哥山亂平其歲合丹大王復反明年帝復親征玉昔帖木兒及濟甯郡王帖木兒帥師連敗合丹於貴烈河及惱木連合丹退守其城玉昔帖木兒以計緩之而乘勝冒冰雪疾進擣之黑龍江北合丹遂遁至高麗以死事具合丹傳二十六年師還錄功詔加太傅開府儀同三司賜內府七寶冠帶二十九年賜步輦入內庭加錄軍國重事宗王帥臣咸稟命焉明年玉昔帖木兒請以皇太子舊寶授皇孫遂命玉昔帖木兒代伯顏討海都以輔皇孫於北邊三十一年世祖崩從皇孫南

還諸王皆會玉昔帖木兒謂晉王甘麻刺曰宮車宴駕已踰三月神器不可久虛前者儲闈符璽既有所歸王宗盟之長也奚待而不言甘麻刺言願北面事之於是成宗遂卽位詔進秩太師賜以上方玉帶寶服其歲命復鎮北方元貞元年議邊事入朝兩宮賜宴如家人禮賜其妻宴服及他珍寶以疾薨玉昔帖木兒凝重端直小人莫敢干以私世祖念先世功加撥江南全州一萬八千戶賜之大德五年詔依前官加贈宣忠同德弼亮功臣廣平王謚貞憲子木刺忽襲萬戶仁宗卽位拜知樞密院事皇慶元年死頭旣襲淇陽王於是亦封木刺忽爲廣平王其後木刺忽弟脫脫哈嗣廣平王脫脫哈被誅事在權倖傳於是木刺忽子阿魯圖襲阿魯圖別有傳阿魯圖薨無嗣其後有廣平王咬咬坐出征延緩削爵史失其世

者勒蔑亦曰折里麥兀良合氏或曰速不台之從兄也父曰札兒赤兀歹亦居於不而罕山者勒蔑生與太祖同歲太祖生於迭里溫孛勒答合札兒赤兀歹贈以貂襍曰者勒蔑同生當使爲服役太祖旣娶於宏吉刺札兒赤兀歹遂送者勒蔑之太祖所以委付焉太祖爲蔑里乞圍於不而罕山時惟博爾朮者勒蔑從以周旋太祖始與同艱虞者二人也太祖爲汗以博爾朮者勒蔑爲諸將長太祖之追泰赤烏與汎忽戰於斡難河有矢傷於頸者勒蔑爲太祖吮其壅血而裸身以入泰赤烏帳中竊其酪以飲太祖太祖蘇乃具知之而問其故對曰裸身者乃恐被獲於敵因僞爲襍衣被刑而逃者可倖免也太祖大悅然益感之及卽大位以爲千戶並長火兒赤四百人許免九死者勒蔑戰則居先無敵不克太祖嘗曰吾有者勒蔑忽必來哲別速不台爲先鋒可以斷堅石而涸

深淵也後人思其功遂目爲開國四先鋒云者勒蔑旣爲千戶旋卒

忽必來一曰忽必雷曰虎必來巴魯刺思氏元同姓也世具始祖諸族傳忽必來始事札答刺太祖與札木合別居忽必來與同族忽都思皆來歸太祖爲汗以爲云都赤征伐諸國忽必來常爲軍鋒及卽大位以爲千戶命總諸軍事太祖嘗曰能服諸不服者忽必來之功也時畏吾兒已請降而哈刺魯未附乃命忽必來帥師征之忽必來師至而降事具哈刺魯傳初太祖嘗問博爾朮等人生何者最樂博爾朮曰莫如臂名鷹控駿騎御華服暮春之天出獵於野博爾忽曰鷹鶻自空搏擊飛禽不搏落不止憑騎觀之斯爲樂也忽必來曰圍獵之時眾獸衝突觀者樂矣太祖曰不然人生之樂莫如殲馘仇敵如木拔根乘其駿馬納其妻女以備後宮

乃爲最樂其與博爾朮博爾忽皆被親洽如此

赤老溫遜都思氏泰赤烏部人也父曰鎖兒罕失刺初太祖尙少泰赤烏忌之執而械諸鎖兒罕失刺之家鎖兒罕失刺善遇之異日移械他所會泰赤烏大宴斡難河太祖乘閒逸然恐終不免夜仍叩鎖兒罕失刺帳赤老溫與其兄沈白女弟合答安共謀匿諸氈車中泰赤烏索之不獲鎖兒罕失刺資之鞍馬餚糧夜遣之太祖旣強盛遂破泰赤烏鎖兒罕失刺舉家來歸太祖譴曰來何遲也自是兄弟皆見親任蔑里乞百姓旣降復叛據台合勒山寨遣沈白攻之沈白圍而滅之沈白亦曰闖拜勇猛有功赤老溫日侍太祖戰輒突陣名遂與博爾朮木華黎博爾忽塔克烈王汗困於乃蠻失其妻孥亡其甲仗馬牛無算乃遣使以四將名乞其往救太祖許焉四將大敗乃蠻奪所掠而還漠北之平赤老溫四人力

戰功多太祖卽大位問鎖兒罕失刺父子所欲對曰得蔑里乞故地薛靈哥河下營足矣太祖許之并宥其九死復命射獵積禽行軍俘獲皆專有之太祖旣設四怯薛赤老溫領第四怯薛赤老溫功多名高而其後不甚顯故第四怯薛絕常以右丞相領之然赤老溫子曰納圖兒爲御位必闇赤納圖兒子曰察刺官隨州達魯花赤遂失怯薛亦莫喻其由焉察刺卒子曰忽刺襲累官至江東肅政廉訪使卒贈陳留郡侯謚景桓忽刺子曰脫鐵穆耳以東平管軍上千戶達魯花赤分戍明州旣而改越卒子曰月魯不花月魯不花號芝軒少受業於韓性性在儒林傳月魯不花能文章舉江浙右榜第一元統元年成進士授台州錄事司達魯花赤時縣未有學月魯不花首建孔子廟延師以教多士以父喪歸至正八年累遷都水監丞改集賢待制除吏部員外郎兩命出糴粟江

浙民無纖毫擾復丁母憂中書遣賄且起復不應十二年右丞相脫脫南征辟從軍事督餉饋以勞進吏部郎中拜監察御史是時郊廟禮歲或缺月魯不花首言天子宜躬祀南郊殷祭太室又言皇太子天下之本當簡老成重臣爲之輔導帝皆嘉納之擢吏部侍郎典選江浙時稱其公會朝議欲造海船於河閒長蘆月魯不花上疏言其非便以是忤議者改工部侍郎出爲保定達魯花赤保定歲輸糧數十萬石於新鄉民皆憚苦月魯不花請改輸京倉以便之十五年拜吏部尙書父老詣闕乞留命以尙書知郡而紅巾已渡河月魯不花修城浚濠爲戰守具廷議以五省八衛軍出戍外鎮月魯不花請留其兵護本郡遂統黑軍兼團結西山民寨賊再侵境皆不利去錫上尊四馬百匹僚佐增秩有差十七年設詳定司召還爲詳定使民繪像事之去一月而城陷改大都路達

魯花赤有執政冒奏以故中書令耶律楚材先墮地與番僧月魯不花格不與還吏部尙書時程思忠盜據永平爲也速所圍乞降詔月魯不花往受之眾不信難其行月魯不花毅然曰臣死君命分也奈何計禍福哉竟入城諭賊賊竟不害之遷翰林侍講學士俄復以爲大都路達魯花赤入見帝帝曰朕以畿輔民疲敝故特用卿耳尋除南臺御史中丞帝御嘉禧殿勞遣之賜上尊金幣皇太子書成德誠明賜之月魯不花由海道趨紹興旣而除浙西肅政廉訪使十八年張士誠進據杭州月魯不花度不可與處乃謂其從子同壽曰吾世受國恩可侶賊耶卽命具舟載妻子而自匿櫃中蔽以藁秸脫走出慶元士誠遣鐵騎追至曹娥江不及改山南廉訪使浮海往抵鐵山遇倭寇乃率同舟人力戰拒之賊登舟攫月魯不花令拜月魯不花大罵遂遇害其時月魯不花次子樞

密院判官老安從子百家奴扞賊亦死之同舟死者八十餘人而首賊則已爲其奴那海所刺死事聞贈撝忠宣武正憲徇義功臣銀青榮祿大夫上柱國遼陽平章政事謚曰忠肅

博爾忽亦曰博羅渾曰鉢魯完曰孛羅兀勒許兀慎氏主兒乞部人也初太祖收主兒乞博爾忽時小兒也太祖奇其貌攜以歸宣懿太后養爲己子命太祖弟畜之太祖以爲火兒赤征塔塔兒也塔塔兒以死士潛入宣懿太后帳中時拖雷太子尙幼爲所挾將刃之博爾忽妻阿塔尼出突厥賊髮賊刃落者刃者勒蔑聞阿塔尼呼聲而至遂殺賊拖雷太子乃免征克烈時窩闊台太子傷於矢且失馬博爾忽陷陣求得太子爲吮其壅血疊騎還太祖卽位錄戰伐諸功許免九死以爲千戶其後命征吐麻吐麻設伏林間博爾忽被殺太祖復命禿魯伯再征之滅吐麻賜博爾忽家吐麻

民一百戶子脫忽襲職從憲宗征討並錄前世功賜淇州一千戶爲食邑子失烈門征大理亦以戰歿太祖所置四怯薛獨博爾忽早絕而天子自領之曰也可怯薛其後失烈門子曰木土各兒曰月赤察兒木土各兒爲太子伴讀

月赤察兒性仁厚勤儉事母以孝聞年十六世祖召見卽命領四怯薛歹官至元十七年長也可怯薛俄除宣徽使並錄先功賜以江南武岡綏甯五千戶二十八年徹里發桑哥之姦帝訪之不忽木而信月赤察兒復陳其蒙蔽悖亂帝益大悟以爲月赤察兒功以沒入桑哥黃白金田畝別墅賞其清彊而湖廣地連番蠻畲丁溪子善驚好鬪旣大爲要束木所擾帝思得賢方伯以撫安之月赤察兒舉合刺合孫以爲平章政事果賢能也成宗卽位加月赤察兒太保儀同三司錄軍國重事兼樞密宣徽二使大德四年進

太師初海都篤哇據金山北時入爲寇垂五十年五年朝議北師少怠紀律不嚴詔月赤察兒行邊帥師會懷甯王及欽察親軍都指揮使土土哈之軍共擊之大破其眾於是海都走死篤哇請降月赤察兒因啟懷甯王曰篤哇之妻我弟馬兀合刺妹也宜遣以報篤哇許其降若待命於上則恐失事機矣懷甯王以爲然旣遣使乃入奏帝深贊之篤哇旣馴服由是叛人稍稍來歸十年及懷甯王踰金山受諸王明里鐵木兒等之降明年武宗卽位篤哇以遣子寬徹入朝封甯肅王尋薨而海都子察八兒尙未順命月赤察兒乃奏曰諸王禿苦滅本懷攜貳而察八兒游兵近境叛黨素無悛心倘合謀致死則是隳垂成之功也臣謂宜厚撫寬徹獎其首善又諸部來歸我地不足牧宜處降人於金山之陽吾軍屯田金山之陰軍食旣饒又成重成就彼有謀已據其腹心矣於是帝

命移軍阿塔罕三撒海而察八兒果欲奔寬徹不見納亦來降北邊始甯矣其歲始置和林行中書省以月赤察兒爲右丞相封淇陽王賜金印依前太師錄軍國重事而合刺合孫爲左丞相二賢相處邊境益清明年合刺合孫薨至大二年月赤察兒言臣與合刺合孫共事錢穀必與臣議今右丞囊家出入不復關聞予奪失當反相凌侮輒託故赴京師帝鎖囊家至和林鞠之月赤察兒姿貌英偉望之如神知人明持法堅爲時所稱四年入朝仁宗宴於大明殿眷禮有加其歲薨詔仍太師開府儀同三師右丞相淇陽王加贈宣忠安遠佐運弼亮功臣上柱國謚忠武子七人曰塔刺海曰馬刺曰孤頭曰迭禿兒也不干曰也先鐵木兒曰奴刺丁曰伯都塔刺海別有傳孤頭累官至宣徽院使至大元年遙授右丞相請設尙冠尙衣尙輦尙沐尙輦尙飾六奉御凡四十八員從之

時工役繁興御史臺言比奉旨罷不急之役今復爲各官營私宅臣等以爲俟旺兀察都行宮及大都五臺寺畢工然後從事爲宜詔除孤頭及三寶奴所居餘悉罷之尋加孤頭太師以建第賜鈔二萬錠父子同時並爲太師自古未之有也二年賜名脫兒赤顏三年加錄軍國重事皇慶元年襲淇陽王仍太師知樞密院事薨也先鐵木兒襲淇陽王也先鐵木兒別入亂臣傳既被誅完者帖木兒馬刺子也襲淇陽王後至元元年拜御史大夫加太傅其歲御史言完者帖木兒乃賊臣也先鐵木兒骨肉之親不宜復居大位乃命流於廣海安置封遂絕博爾忽從孫塔察兒

塔察兒一曰倴蓋幼直宿衛太祖崩拖雷太子監國時金故中都盜賊恣意殘殺直入富家載運其物有司不能禁乃命塔察兒及耶律楚材往治之嚴誅首惡由是巨盜屏跡燕人稱焉太宗二年

自將伐金授塔察兒行省兵馬都元帥分宿衛與諸王軍士俾統之從濟河克鳳翔明年還克河中四年從渡白坡時拖雷太子已破金兵於三峰山詔塔察兒會速不台圍汴太宗及拖雷太子乃還塔察兒與金人戰於南薰門日發巨礮以攻其城金主不能支遂奔河北明年金主奔蔡州塔察兒復帥師圍蔡乃遣使約宋人共取金宋遣江陵副都統制孟珙將兵二萬并米三十萬石濟塔察兒軍六年金主自焚遂滅金詔塔察兒留鎮中原分兵屯河上以備宋宋人背約出不意入汴洛塔察兒掩至悉走去十年卒子曰別里古解曰宋都解別里古解始爲火兒赤憲宗二年襲職總四萬戶蒙古漢軍攻宋兩淮七年復從國王塔察兒伐宋襄陽逼樊城力戰死宋都解亦曰宋都帶至元七年賜金虎符襲蒙古軍萬戶從史天澤阿朮圍襄陽襄陽下復從伯顏阿朮渡江克鄆州

又從阿里海牙進克岳州江陵於是詔分大軍爲三伯顏趨臨安阿里海牙進取湖南而建宋都解爲大將加昭毅大將軍同漢軍三萬戶武秀張榮李恆及兵部尚書呂師夔行都元帥府以取江西軍至隆興江西轉運使知府劉槃降遂以都元帥檄諭江西諸郡次第歸附十三年進軍福建而宋陳宜中張世傑立益王是於福州兵勢更盛詔以安慶蘄黃諸郡宿兵益宋都解宋魏天祐游義榮詣宋都解降宋都解以天祐爲管軍總管兼知邵武府事義榮遙授建甯路同知充管軍千戶宋都解勇敢有略平南服功多竟未及敘功而卒

朮赤台一曰主兒扯歹一曰朮兒徹丹一曰朮徹台一曰拙赤解兀魯兀台氏也世具始祖諸族傳兀魯氏與忙兀氏皆從太祖贊襄大業太祖開國二部最爲勁旅又與札刺兒氏宏吉刺氏亦乞

列思氏號爲五投下亦號五諸侯其三同姓其二外戚也初朮赤台事札答刺酋札木合答闡版朱思之戰朮赤台棄札木合舉族來歸朮赤台有膽略善騎射勇冠一時太祖以族屬尊行每稱之曰伯父後太祖與克烈交惡克烈王子鮮昆者名武勇諸部皆畏之其時王汗以朱力斤董袞火力諸部來侵戰於哈蘭眞沙陀朮赤台畏答兒爲先鋒畏答兒戰敗朱力斤而傷於矢不能前朮赤台繼進大敗其眾旣又單騎陷其中軍射鮮昆中其頰於是敵軍遂退俄而進兵折運都山克烈滅而王汗弟札阿紺字進女亦八哈及沙兒合黑塔泥迎降因全其部眾尋札阿紺字復叛朮赤台以計襲而取之札阿紺字亦曰札哈堅普太祖前召還於金者也畏答兒卒太祖命朮赤台並將忙兀軍俟忙哥長而還之其後伐乃蠻當春馬瘦至建忒該山朮赤台曰我人少遠來且留此牧馬

夜多設火爲疑兵彼雖眾而主怯必疑而遲至如此則我馬已飽騰矣然後馳而擊之此養銳之計也從之遂平乃蠻太祖以朮赤台平漠北功多嘗曰我之望汝如高山遮護也太祖旣正尊號論功遂賜嬪御亦入哈太祖所納札阿紺字之女也臨行太祖慰而遣之與以札阿紺字從媵百人又命朮赤台統兀魯四千人世世無替後復從哈撒兒王徇遼西皆下又從哈撒兒征女真收其北境而還卒子怯台材武過人太宗時錄先世功賜德州二萬戶爲食邑封德清郡王賜金印怯台亦曰乞忒自太宗至世祖厯事四朝薨子曰端眞拔都兒曰合答端眞亦曰段眞曰鍛眞襲郡王世祖之擊阿里不哥也合答從戰於昔木土合答獲其大將阿里不哥遂敗衄賜黃金焉復會攻濟南及襄陽皆有功至元十一年伐宋合答爲左丞相行中書省於淮西尋改爲行樞密院合答專主

奉制淮東之師劉整欲渡江合答不聽也宋平十四年以合答爲北京行省平章政事十八年復賜江南連州食邑二萬一千戶合答子脫歡嘗將兵破昔里吉藥木忽兒於野孫漠連及征乃顏脫歡弟慶童亦在軍雖病猶力戰世祖嘉之合答子三人曰脫歡曰亦憐只班曰慶童脫歡二子曰塔失帖木兒曰朵來塔失帖木兒子曰匝刺不花慶童子曰月魯不花自怯台以下子孫凡九皆襲郡王

畏答兒一曰溫里塔兒亦曰忽亦勒答兒亦曰忽因答兒忙兀氏也世具始祖諸族傳畏答兒初亦事札木合同尤赤台俱舉族來歸太祖喜之因稱曰群禪言聰明也太祖與克烈王汗之戰於哈蘭真沙陀也太祖兵少眾皆危懼畏答兒曰我猶鑿諸君猶斧鑿匪斧不入我請先入諸君繼之矣遂陷陣尤赤台繼至合戰大敗

之日已晡畏答兒還乃知流矢中其腦帝親傅以善藥留處帳中尋畏答兒從獵於合勒合河創發卒帝深惜焉王汗滅帝以其將合答黑能力戰以衛王汗也釋不殺使領其民百人隸畏答兒子忙哥爲之役屬仍令忙哥收完忙兀人民之散亡者太宗思其功復以北方萬戶封忙哥爲郡王八年忽都忽大料漢民分城邑以封功臣授忙哥泰安州萬戶帝訝其少對曰臣今差次惟視舊數多寡其有增損當由聖斷帝曰畏答兒功大其增封二萬戶與十功臣同爲諸侯者封戶皆異其籍忙哥薨孫曰只兒瓦解曰乞答陽州二萬一千戶忙哥從孫曰博羅歡

博羅歡祖曰蘸木曷一曰鐵木曷畏答兒幼子也父曰瑣魯火都蘸木曷謚武毅瑣魯火都謚忠定俱贈太尉泰安王博羅歡年十

六爲本郡斷事官世祖初敗阿里不哥平李璮博羅歡皆與有功至元七年雲南王忽哥赤爲大理都元帥寶合丁酰死中書擇堪治獄者四人帝皆不許其後丞相線眞舉博羅歡命往治之未至寶合丁密餽以金六簾博羅歡欲拒之而懼其握兵徼外或生變乃陽喜曰吾行橐不能容奈何姑仍持還待我歸朝而取也博羅歡至則竟其獄誅寶合丁而致其金於省帝爲之大嘉賚且謂線眞曰卿知人矣遂授博羅歡大都右衛親軍都指揮使在上都則並兼三衛十二年方伐宋乃拜淮西右丞詔分大軍爲二右軍受伯顏阿朮節度左軍受博羅歡節度俄命諸軍皆統於伯顏改博羅歡淮東都元帥罷山東經略司以其軍屬焉博羅歡進軍下邳知清河城小而固未易拔也乃頓大軍以疑之而以輕騎倍道襲海州以攻其不備海州破清河亦降時宋制置使李庭芝猶固守

揚州阿朮戰其南伯顏自建康入朝復至軍自益都而南博羅歡從伯顏渡淮越寶應掠高郵舟師自西小河入漕河以援灣頭與阿朮應明年博羅歡拔泰州新城遂下揚州十四年討平叛臣只兒瓦台於應昌賜玉帶文綺俄拜北京行省右丞召還方有疾時以江南新附多反側詔募民能進討者自爲一軍制命符節皆與正同博羅歡不能朝乃附董文忠奏曰今勝軍百萬而假此無名之徒彼一踐南土則俘奪人妻孥貨財仇怨益滋叛者將益眾矣帝聞大悟而常德果入訴唐兀軍殘暴其境詔斬以徇遂盡罷所募軍十八年授甘肅右丞二十年拜西臺御史大夫以疾歸乃顏反帝將親征博羅歡曰昔太祖分封東諸侯其地與戶臣皆知之以二十爲率乃顏得其九五諸侯得其十一今徵五諸侯兵足當之矣何至上煩乘輿哉臣疾且愈請事東征帝命之督五諸侯兵

與乃顏戰敗之帝卒亦親征獲乃顏焉又與乃蠻台王討合丹追至高麗戰鬪凡四歲合丹走死斬其子老的俘其二妃而還拜河南平章政事汴南諸州莽爲巨浸博羅歡躬行決口督有司繕完之成宗立入朝請以泰安絲四千斤易內府縉帛給忙兀軍許之復還河南帝謂之曰卿今白鬚所聞世祖德言多矣因以世祖所佩弓矢輦帶賜之大德元年移湖廣又移江浙居歲餘薨贈推忠宣力贊運功臣太師開府儀同三司上柱國泰安王謚武穆博羅歡臨陣常以身先之悉推所獲與將士故能得其死力居常以國事爲憂聞變卽請行必終其事乃己人以爲難然過於寬厚丞相安童嘗請以爲平章政事帝以爲緩不用也故終不入中書云子四人曰渾都曰伯都曰埜先帖木兒曰孛羅渾都山東宣慰史遙授平章政事埜先帖木兒官河南左丞相終翰林學士承旨孛羅

陝西平章政事埜先帖木兒子尼摩星吉襲郡王亦思制瓦性吉
官中政使

伯都大德五年擢江東道廉訪副使拜南台侍御史召入僉樞密院事領舍兒別赤至大二年出爲南臺御史中丞遷西臺御史大夫延祐元年拜甘肅平章政事甘肅地弗便漕粟時米價騰涌陸輓每石至費二百緡乃爲經畫至所省四百餘萬緡而諸倉充溢以甘州氣寒地瘠少稔歲民饑則發粟振之春闕種則貸之於是軍餉既足民食亦給帝以爲能賜名鷹弓矢甲冑及鈔五千緡以勞焉四年移江浙入爲太子賓客上書陳古聖王正心修身之道帝嘉納焉遷南臺御史大夫適太后知之謂東宮官不宜使外止其行尋以疾辭去寓居高郵英宗卽位復命爲南臺御史大夫陞見又以疾固辭帝慰諭久之命以平章祿養於家復賜鈔十萬緡

所服藥物須空青詔遣使江南訪求之伯都辭謝曰臣曩膺重寄深懼弗稱今已病廢况敢叨重寵乎並以所給祿歸有司泰定元年卒朝廷知其貧賄鈔二萬五千貫御史奏益一萬仍還所辭祿妻宏吉刺氏弗受曰始伯都仕於朝不敢虛糜廩祿今沒矣妾苟受之非其意也卒辭之伯都世家子不矜伐嗜書史有吏幹晚節勇退妻能還祿以成其志天下兩賢焉後贈江浙左丞相魯國公謚元獻子篤爾只將作院判官

論曰此皆太祖披荆棘斬草萊之臣也亦遼金曷魯敵魯歡都治訶之倫矣然博爾朮諸人茅土累葉而者勒蔑忽必來赤老溫史文闕焉豈其子孫不振遂遺其先世之勳哉然赤老溫之後猶有月魯不花足以張其家世也豈不疏歟或遂以爲晉祿薄於介推必不然矣

衡陽蔣振文

曾毓讓 刊

門人曾仁襄校

門人曾士琮詳校

元書卷三十一

元書卷三十二

木華黎列傳第七

邵陽曾廉譏

木華黎亦曰模合里曰謀合里曰沒黑肋或曰摩瞻雞札刺兒氏元同姓也而未知其所出札刺兒居斡難河東及兀魯忙兀早來歸木華黎父曰孔溫窟哇亦曰古溫兀阿孔溫兀答常在太祖麾下攻蔑里乞諸部數立功後爲乃蠻所敗困絕乏食孔溫窟哇走水次縛致二歲駱駝炙其肉啖太祖太祖馬斃而追騎至孔溫窟哇因以己馬進太祖遂死之至治元年詔贈推忠效節保大佐運功臣開府儀同三司上柱國魯國王謚忠宣木華黎生時有白氣出其帳神巫異之曰此非常兒也長猿臂善射沈毅威重事太祖以忠勇稱太祖常行谿谷間遇盜矢下如雨木華黎發三矢中三

人乃解馬韁持之衛太祖以出朮赤台之襲王汗于折運都山木華黎繼進克烈遂滅木華黎與博爾朮又多所擘畫征伐之際遇敵則力戰入帷幄輒謀議成而後動太祖卽大位遂命二人並爲萬戶木華黎爲左萬戶自斡難河源以東至合刺溫山木華黎治焉太祖旣平漠北六年從伐金木華黎先入其陣遂大破金師三十萬於野狐嶺木華黎連年出入山前後金人多降木華黎皆撫用之九年太祖以大軍自燕北還命特將東征降高懿遂攻北京十年春取北京金元帥烏古倫寅答虎降以爲北京留守北京路所領諸府節鎮刺郡皆降是時木華黎以蒙古不花吾也而史進道史天祥石抹也先爲裨將及降興中義州復拔其豪石天應王珣使從己征戰皆盡其謀勇故所向輒捷惟錦州張鯨鯨弟致己降復反頗勞兵力事在鯨傳十二年木華黎旣誅張致大軍遂東

拔蓋金復等州其歲之秋太祖以木華黎爲太師都行省封國王承制行事賜之金印誓券曰子孫傳國世世不絕又畀以大駕所建九旂大旗竝諭諸將曰汝等當視如朕親臨也當是時太祖已有意西征故以平金事專付木華黎於是木華黎受經畧中原之任遂出燕南破大名府明年頗定山東東路而還十三年自西京出太和嶺入河東明年河東南北二路亦定十五年復自燕徇趙兵指河北西路宋濟南治中嚴實舉所得太行以東州郡降木華黎遂進敗金兵於黃陵岡而留嚴實爲山東西路行省圍東平戒平果克嚴實入東平木華黎建行省於雲中已畧定河北遂欲先蕩關中擣汴梁之首以成建瓴之勢乃由東勝渡河入葭州使石天應守之復連攻綏德延安鄜坊惟延安不下木華黎至坊間金

復取陘州遂自丹州渡攻陘克之進禽金平陽公胡天作於青龍堡遂克河中召石天應於葭州以爲河東陝西行臺付以河中使造浮梁於河以濟往來之師木華黎復自臨晉渡拔同州以京兆有備乃西攻鳳翔而石天應已爲金所殺先是木華黎在河東有星晝見隱士喬靜真請問曰今觀天象未可進征也木華黎慷慨無所顧謝靜真使歸至是鳳翔月餘不拔謂諸將曰吾受命專征賴天之靈主上之福諸君之力不數年而金之北地畧已平矣然前攻延安今攻鳳翔皆不能克吾命殆有限耶乃遣兵徇鳳縣而還木華黎至河浮梁未成木華黎急不能待乃復西攻下十餘堡乃還至聞喜寢疾遂篤乃召其弟帶孫命之曰我擐甲執銳垂四十年爲國家征討無遺恨也獨汴京未下汝其勉之薨葬廣甯木華黎武功推開國第一而初起事多仍舊習攻下城邑不守而去

故多勞往復其賞罰嚴明每戒眾諸將莫敢仰視而欲然虛懷能用人之謀爲有大將風焉至治元年詔贈體仁開國輔世佐命功臣太師開府儀同三司上柱國魯國王謚忠武子李魯襄

李魯一名枹柯通諸國語善騎射木華黎薨李魯朝太祖於西城行在命嗣國王統諸軍如其父時夏主李遵頊蓄異圖密詔討之李魯攻下銀州斬首數萬級俘監府塔海令都元帥蒙古不花將兵守要害而還太祖二十一年詔賜功臣戶口爲食邑曰十投下李喜孫招令降全欲降部將田世榮不欣喜孫被殺明年全兵大敗食盡乃降諸將曰全非心服也請誅之以絕後患李魯曰不然殺一人不足以立威恐山東未降者心沮也奏聞詔便宜處之乃以全爲山東淮南行省由是山東郡縣聞風欵附獨金人守濰州

未下孛魯冒暑攻之或言宜少俟孛魯曰主上征西往復數載臣子敢以暑自逸乎滕州克以屬石天祿孛魯將還乃以先鋒元帥肖乃台屯濟兗闢闢不花屯濰沂莒備宋千戶按札兒駐河北備金行至燕獵於昌平卻居民獻牛酒燕人悅之俄聞太祖崩赴趨北庭哀毀遘疾明年薨年三十二至治元年詔贈純誠開濟保德輔運功臣太師開府儀同三司上柱國魯國王謚忠定子塔思襲塔思亦曰答石一名查刺溫亦曰札刺溫火兒赤或止曰火兒赤年十八襲爵太宗二年叛將武仙圍潞州命塔思救之仙退軍而塔思爲金將移刺蒲阿所襲失利潞州遂陷其冬太宗親伐金塔思復取潞州帝西攻鳳翔命塔思駐師渭上斷金潼關之援四年拖雷太子三峯山之戰塔思渡河會合並進金師大潰塔思遂畧下河南諸郡因請分攻汴以補失潞之愆帝命卜之不吉乃止五

年會貴由太子東征蒲鮮萬奴遼東平六年帝以宋人背約興兵將自將伐宋塔思曰臣願仗天威掃清淮浙此不足勞大駕也太宗大悅賜黃金甲玻璃帶良弓二十明年曲出太子及忽都忽伐宋塔思與合軍拔棗陽塔思復引兵攻郢俘生口數萬而還自是頻年伐宋至蘄州光黃皆有斬獲太宗念木華黎之功七年詔賜東平四萬戶爲食邑以給其子孫塔思有世勳而性恭謹常過汴守官劉福置酒大慶殿塔思曰此故金主所居我人臣也敢飲此乎遂宴福家其守禮節如此十一年薨年二十八子碩篤兒幼弟速渾察襲碩篤兒既長別賜三千戶爲食邑得建國王旗幟降五品印一七品印二付其家臣置官屬如列侯焉碩篤兒薨子忽都華襲薨子忽都帖木兒襲薨子寶哥襲薨子道童襲

速渾察性嚴厲太宗攻鳳翔速渾察從兄塔思營於渭北金師出

潼關欲援鳳翔戰而敗卒不能西鳳翔遂克曲出太子取宋棗陽攻郢速渾察皆與焉及襲爵置營阿兒查禿總中都行省蒙古漢軍凡他行省監鎮事必先白而後上聞帝常遣使至見其威容凜然紀綱肅整還以白帝帝嗟嘆以爲眞木華黎家兒也他國使有至者每見皆倉皇失措或諫曰諸王百司旣莫敢越而復示之以威不已甚乎速渾察曰言誠是也今天下初附人心未安非嚴何以一之寬猛自有時也人服其言速渾察弟曰霸突魯從世祖於藩邸一日世祖言曰今天下稍定我欲勸主上駐蹕回鶻以休兵息民何如對曰幽燕之地形勢雄偉南控江淮北連朔漠天子居中以受四方朝覲之所也大王誠欲經營天下非燕不可世祖大是之憲宗九年伐宋霸突魯出蔡州傳檄諭宋邊將遂與世祖兵合而南五戰

皆捷遂渡大江傅於鄂會帝崩阿里不哥謀立於和林世祖北還霸突魯總諸軍以待命世祖至開平卽位還定都於燕嘗曰朕居此以臨天下霸突魯之謀也師還中統二年卒於軍大德八年贈推誠宣力翊衛功臣開府儀同三司上柱國東平王謚武靖阿里乞失追封莒王謚忠惠速渾察薨延祐三年贈宣忠同德翊運功臣太師開府儀同三司上柱國東平郡王謚忠宣子忽林池襲忽林池弟曰乃燕曰相威曰撒蠻相威自有傳乃燕好學有賢名憲宗擇於速渾察諸子欲以乃燕襲國王乃燕力辭曰臣有兄忽林池在未敢越也帝曰忽林池柔弱不勝忽林池亦固讓乃燕頓首涕泣以辭不得命則曰國王必不敢受願代兄行軍國事於是忽林池襲國王事無巨細皆決於乃燕世祖在藩亦服其論事之當稱爲辭禪焉以疾卒至正八年贈中奉大夫遼陽參知政事護

軍魯郡公子曰碩德曰伯顏察兒碩德亦曰拾德世祖時入宿衛典朝儀後同知通政院事使至遼東討定幹拙吉烈滅寇亂復從征乃顏及使西域皆有功卒累贈推忠宣惠甯遠功臣資善大夫嶺北右丞上護軍魯郡公諡忠敏子別兒哥帖木兒別兒哥帖木兒子朵兒直班自有傳

撒蠻生而穎異襁褓時世祖撫育之如子嘗挾之南征濟大江慮其有失繫之舟中御榻及成童常侍左右嘗詔曰男女異路古之制也况掖庭乎汝其正是禮俄而近侍李羅犯禁撒蠻執而囚之別室帝詢知而釋之撒蠻曰令自陛下出而自違之何以責臣下乎帝驚嘆其不凡無何卒年方十七子脫脫未冠直宿衛長偉儀容喜親儒士從征乃顏脫脫擐甲率家奴數十人疾馳擊賊帝自山上望見之遂解佩刀及乘馬賜焉復從皇孫征合丹馬陷於淖

從弟刺不丁揅以出因而逐敵大敗之成宗以爲上都留守通政院使虎賁衛親軍都指揮使大德三年平章江浙政事詔中書都門外餕之脫脫至省戒椽屬無聽僕從私囑且曰凡事關軍民則亟言之當言不言爾之責也言而不聽我之咎也時朱清張瑄專海運致位外執政怙勢多不法然知脫脫嚴恐發其事託人以明珠黃金賂焉脫脫大怒繫其人於獄遣使以聞帝喜曰脫脫眞無媿世臣矣寵賚有加數年江浙豪猾屏息民以大安爲立生祠焉忽林池薨霸突魯子和童襲

和童皇后姊少子也故襲國王和童兄曰安童曰定童曰霸都虎台安童自有傳和童薨阿里乞失子忽速忽兒襲忽速忽兒薨追封薊王子朵羅台襲

朵羅台延祐時嗣國王天順元年懷王稱兵大都自立爲皇帝朵

羅台及陽翟王太平帥師進討其冬及懷王將燕鐵木兒戰於檀子山敗績天祐二年朵羅台遂見殺朵羅台弟曰乃蠻台朵羅台既死難初以脫脫子朵兒只襲復改以乃蠻台襲

乃蠻台大德五年從海山太子與海都篤哇戰以功賜貂裘白金授宣徽院使七年拜嶺北右丞至治二年進平章甘肅政事天祐二年徙陝西尋拜西臺御史大夫命送太宗舊授察合台皇兄之寶於其裔孫于闐王燕只哥鶻乃蠻台威望素嚴至其境禮貌益尊塞外益凜然知朝廷之重也至順元年遷上都留守加開府儀同三司知嶺北行樞密院事封宣甯郡王賜金印後至元三年乃蠻台以己應襲國王訴於朝四年遂命嗣國王改授金印賞賚珠絡半臂海東名鷹西域文豹國制此爲極恩矣六年拜嶺北左丞相仍國王知樞密院事至正二年遷遼陽請老歸念軍士貧乏以

麥四百石馬二百匹羊五百頭徧給焉乃蠻台敏幹在嶺北也舊制募民中糧餉邊其歲用事者挾私爲市殺其數民進退失措乃蠻台請悉授所輸爲下年之數民感其德在甘肅甘肅歲糴糧二萬石自甯夏蘭州各運至甘州自甘州運至亦集乃路濟之道路迂乃蠻台令自甯夏徑趨亦集乃近者逾倍歲當省六十萬緡在陝西時方大饑詔募民入粟予爵乃蠻台亦通河南之糴然貧民乏鈔以買乃蠻台取官庫未毀昏鈔得五百萬緡識以省印給民用之俟官給振鈔而易之其善通變率此類也八年薨於家命有司厚賙贈據忠宣惠綏遠輔治功臣太師開府儀同三司上柱國魯王謚忠穆子曰也先不花曰黃兀兒不花也先不花累官右丞乃蠻台既薨於是復以朵兒只襲朵兒只位至右丞相別有傳朵兒只薨子俺木哥失里襲俺木哥失里兄朵蠻帖木兒官翰林學

士俺木哥失里嗣爵十餘歲而順帝北去納哈出者木華黎裔孫也爲太平路萬戶城破見執於明以爲木華黎後也厚待之又知其不忘元縱之還其後爲太尉擁兵數十萬規復遼東久之竟降明又至正十九年有國王囊家台統軍征遼陽其系未之詳也木華黎弟抹歌帶孫抹歌亦曰不合亦曰不花後太祖使管怯薛歹帶孫嘗從太祖征戰復從朮赤太子征林木中百姓積功封爲郡王木華黎之薨以取汴屬之二十年帶孫帥師取彰德明年取濮東平李全逐張林以去帶孫遂圍全於益都全降太宗時賜東平東阿縣萬戶爲食邑子忙哥忙哥子曰塔塔兒台父子俱從憲宗出征憲宗攻宋合州而崩塔塔兒台護靈駕北葬起輦谷是時阿里不哥謀自立欲留塔塔兒台使爲己用塔塔兒台南奔欲就世祖阿里不哥追騎執之將殺之憲宗皇子阿速歹玉龍答失

救之得免至元元年從阿速歹來歸世祖嘉之授懷遠大將軍佩金虎符世襲東平達魯花赤命宿衛四十人給驛送之官治尙鎮靜鄆人安之子哲別嗜讀書習文字至元十四年監東平多善政嘗出藏書一千餘卷置東平學俾學徒講肄之擢江南湖北道提刑按察使改浙西世祖思帶孫功復賜樂昌萬七千戶給其子孫大德四年入覲賜金段卒至正時有郡王尺兒噉伯代領國王朵兒只之眾未知其所出木華黎列將若干人名者蒙古不花史天祥及五部將最爲親附史天倪石天應田雄吾也而移刺涅兒石抹也先槊直腯魯華王珣何實李守賢自有傳史天祥在天倪傳蒙古不花不知其氏族從木華黎爲前鋒張鯨以反誅鯨弟曰致復據錦州木華黎欲孤其勢乃使蒙古不花攻紅羅山主將杜秀降以爲節度使木華黎欲攻錦州而慮致地險兵精未可猝破也

乃使吾也而攻溜石山以致致師而使蒙古不花將兵屯永德以候其過致果遣鯨子東平將騎兵八千步卒三萬以援溜石於是木華黎疾馳至神水東遇之木華黎選善射者數千令曰賊步卒無甲疾射之乃麾騎兵進蒙古不花過其後路夾擊之東平死於陣並斬首三千八百級錦州自是遂克木華黎下真定武仙降遺蒙古不花分兵略定河北衛懷孟州會於濟南明年從木華黎渡河取葭綏進距延安三十里金完顏合達以兵三萬陣於城東蒙古不花以騎三千覘之馳告木華黎曰彼見吾兵少有輕我心當伏勁兵先陽敗以取勝也木華黎從其計夜半大軍銜枚以進伏於城東兩谷閒明日蒙古不花與金師甫接卽棄旗鼓走金兵果追之伏發斬首七千級獲馬八百匹然延安卒不下木華黎復東渡河圍陘州遣蒙古不花出秦隴攻鳳翔未幾木華黎復以大軍

傳於鳳翔鳳翔亦卒不下木華黎乃遣蒙古不花南趨牛嶺關徇宋鳳縣而還俄而木華黎薨蒙古不花復從嗣國王李魯攻西夏克銀州李魯還蒙古不花留守要害焉蒙古不花積功爲都元帥卒或曰蒙古不花蒙古其氏也

肖乃台亦曰笑乃觸曰小乃台曰蕭乃台禿伯怯烈部族也以忠勇事太祖令佩金符領蒙古兵從木華黎爲先鋒伐金數有戰功河北都元帥史天倪之爲叛將武仙所殺也時木華黎已薨天倪弟天澤乃攝帥而請援於嗣國王李魯李魯遣肖乃台帥精甲三千援天澤圍中山肖乃台聞仙已遣其驍將葛鐵槍來援乃撤圍迎諸新樂禽之中山守將亦宵遁遂進臨真定仙棄真定出奔肖乃台及天澤入城撫定其民初仙降以其弟質國王軍中聞仙叛遁去肖乃台遣弟撒寒追斬之於紫荆關俘其妻子而還尋進兵

畧太行斬仙將於長勝寨遂還師與天澤同擊斬宋將彭義斌於贊皇既而仙潛結內應夜開真定南門復入據其城肖乃台倉卒以步兵七十踰城走橐城遲明部曲漸集復襲取真定事具天澤傳肖乃台既擊走仙遂帥師收大名定東平又與蒙古不花徇懷孟衛從宰魯定益都宰魯北還肖乃台屯兵濟兗太宗四年渡河徇睢州禽金行省完顏慶山奴於楊驛店大軍圍蔡肖乃台及史天澤攻城北面汝水阻其前結筏潛渡血戰連日金亡朝廷命併將史氏三萬戶軍以圖南征賜東平三百戶或曰百戶命嚴實爲治第分撥牧地日膳供二羊及衣糧焉以疾卒於東平歸葬漠北子七人其名者抹荅兀兒兀魯台抹荅兀兒從世祖攻鄂平阿藍荅兒敗阿里不哥平李璮皆與焉授提舉本投下匠戶達魯花赤卒子火你赤官南臺御史大夫兀魯台爲探馬赤千戶伐宋渡江

有功軍至建康卒子脫落合察兒從伐宋復討武甯叛賊授江州萬戶達魯花赤佩虎符移鎮潮州破張文惠等嘯取之眾卒於軍按札兒亦曰按察兒折跋氏或曰本禿別部族而以爲折跋也嘗從太祖南征有功復從木華黎伐金破金晉安府木華黎北還以按札兒領前鋒總帥屯平陽攝國王事金將侯小叔夜襲河中殺行臺石天應按札兒進兵擊小叔斬首數萬級復河中太宗初嗣國王塔思禦金將武仙於潞州爲移刺蒲阿所襲輜重人口多沒按札兒妻奴丹氏亦被獲送拘汴金主聞按札兒威名召奴丹氏見奴丹氏色莊言正不爲動金主因謂之曰今縱爾還爾能偕爾夫來當厚賞爾奴丹氏陽諾之遂得還太宗聞而嘉之褒賞甚厚遂詔與其夫前鋒事帝帥拖雷太子按只吉歹大王口溫不花大王及國王塔思伐金按札兒以軍從遂拔鳳翔復敗金人於鈞州

及帝北還命偕都元帥速不台圍汴汴人識按札兒旗懼曰其妻猶勇且義況其夫乎金亡詔封功臣賜平陽戶六百或曰食太原五百五十戶以疾卒子曰忙漢曰拙赤哥忙漢從征乃顏海都皆有功終右都威衛千戶卒子乃蠻襲拙赤哥從世祖征鄂有功以征李璮戰死子闊闊朮厯官湖南肅政廉訪使禮部尙書卒子燕帖木兒官南臺御史

闊闊不花按攤脫脫里部族也爲人魁岸有膂力以善射名太祖命木華黎伐金分探馬赤爲五部各置將一人以闊闊不花爲五部先鋒都元帥所向莫能支然不嗜殺略定濱棣諸州俘獲焦林四百餘口但籍其姓名遣歸鄉里徇益都守將降得其財物馬乘悉以分諸士卒太宗四年渡河攻汴及歸德復分兵渡淮攻壽州守將無降意闊闊不花射書城中諭之城中人感泣以綵輿奉金

公主開門納款闊闊不花下令軍中敢入城虜掠者死城中帖然公主哀宗姑也八年太宗分五部將分鎮中原闊闊不花鎮益都濟南按札兒鎮平陽太原李羅鎮眞定肖乃台鎮大名怯烈台鎮東平括民匠得七十二萬戶以三千戶賜五部將闊闊不花得分戶六百立官治其賦得薦置長吏官歲給所得五戶絲又得食益都畸零三百七十戶以疾卒子黃頭代領探馬赤爲元帥從伯顏伐宋道卒子東哥馬襲終右都威衛千戶或曰五部將有孛羅海拔都無怯烈台怯烈台者一曰乞里台拔都與肖乃台同食邑東平皆百戶者也又稱窟里台聲亦近也孛羅海拔都亦曰不里合拔都兒亦止稱孛里海嘗同嚴實破彭義斌又破武仙之師者也事在嚴實傳孛羅海拔都得食德州百五十戶皆木華黎部曲未知誰入五人數也孛羅事軼惟食廣平種田百戶有可攷焉

論曰木華黎之略尙未及英衛之爲將也乃其威重則亦有可觀矣奕葉桓繡率皆忠孝名臣益大門闈反三世之戒躋不顯之休朔方龐厚之氣獨鍾之矣不然博爾朮博爾忽同時齊名而其後不克負荷著籍丹書何札刺兒氏之流芳遠也

曾宗昇

衡陽蔣振文 刊

曾毓讓

門人曾傳銳襄校

門人曾士琮詳校

元書卷三十二

元書卷三十三

東平昭惠公忠惠平定蒙古于中原之書

邵陽曾廉譔

鎮海札八兒二耶律阿朮魯列傳第八

鎮海亦曰稱海怯烈台部族或曰本田姓至朔方始氏怯烈也始爲軍伍長太祖與克烈王汗構兵一夕人心洶懼眾軍大潰太祖遽引去從行者僅十九人太祖與飲班朱尼河水鎮海與焉班朱尼河亦曰黑河曰班朮朱河曰辯屯河曰班真河曰巴勒渚海子飲者示同甘苦識不忘也事具搠只哈兒王傳太祖元年諸王百官大會幹難河上太祖尊號鎮海與署名其歲復從太祖征乃蠻禽卜魯欲汗得賜良馬三年從討屈出律於也兒的石河擊走之復賜珍珠旗佩金虎符爲必闔赤六年從太祖伐金師次撫州與金師遇矢著臆閒裏瘡而戰軍聲大振旣破燕太祖命於城中環

元書

卷三十三 鎮海等傳

一

射四箭箭所至園亭邸第悉以賜之復從討契丹遺族西域河西諸國所俘生口萬計悉以上之賜御用服器白金等物令屯田於阿魯歡阿魯歡者斡兒塞河也河上立城鎮守之因名其城曰鎮海以旌功焉或曰稱海亦名鎮海爲稱海云太宗卽位扈從至西京尋立中書省以鎮海爲右丞相與攻河中鈞州汴蔡並論前功賜恩州一千戶爲食邑數年罷右丞相先是收天下童男女及工匠置局宏州旣而得西域織金綺文工三百餘戶及汴京織毛褐工三百戶皆分隸宏州命鎮海世掌焉定宗卽位以先朝舊臣仍拜右丞相薨年八十四子勃古思嗣食封邑從世祖征花馬大理結浮橋金沙江以濟師中統初授益都宣撫使賜金虎符玉帶改東平副達魯花赤討平寇亂遷濟南宣慰使改南京達魯花赤復討蘄縣叛民平之尋乞病特授保定達魯花赤賜錢萬貫終於家

年八十一

札八兒賽夷氏回回人也爲人雄勇長身美髯方瞳廣額人以其美因稱爲札八兒火者火者言美也初札八兒謁太祖於軍中太祖異其狀使在左右得飲班朱尼河水旣而太祖盡平朔方諸部服西夏乃遣札八兒使於金金人不爲之禮札八兒因留心窺視悉其形勢以歸無何太祖親伐金將道居庸關金人懲哲別之入居庸收其牧馬也乃治鐵閘門布鐵蒺藜百里而守以精銳與關犄角太祖患之乃召札八兒問計對曰黑樹林中有閒道騎行可一人臣向嘗過之若勒兵銜枚以出終夕可至也於是札八兒遂爲前導日暮入谷黎明已在平地疾驅南口金鼓之聲若自天降金人嚴備其北而不虞太祖反自南入也眾遂驚潰居庸旣破太祖遂逼中都歲餘克之太祖曰我師之至中都札八兒之功也

乃授黃河以北鐵門以南天下都達魯花赤留守中都賜養老一百戶併四王府爲之居第焉札八兒已老然每戰被重甲手槊腰弓矢陷陣馳突如飛又能乘橐駝以戰眾莫能當卒年一百十有八贈推忠佐命功臣太傅開府儀同三司上柱國涼國公謚武定子二人曰阿里罕曰明里察阿里罕蚤從父出入行陣勇而善謀憲宗伐蜀爲天下質子兵馬都元帥子哈只終湖南宣慰使贈推誠保德功臣金紫光祿大夫司徒追封涼國公謚安惠子三人曰養安陝西平章政事曰阿思蘭太府監丞曰補寧太僕寺丞養安子阿葩實太僕寺卿明里察贈開府儀同三司上柱國涼國公謚康懿子二人曰亦不刺金終戶部尚書曰哈刺終陝西參知政事耶律阿海遼故族也弟曰禿花以祖撒八兒尹桓州家焉遂爲桓州人阿海天姿雄毅勇畧過人尤善騎射通諸國語金季選使克

烈因見太祖姿貌異常有依附之意遂進言金不修戎備俗日侈肆亡可立待太祖喜曰汝肯臣我乎以何爲信對曰願以子弟質明年復出使與禿花俱來遂以爲質於是禿花直宿衛阿海得參預機務出入戰陣常在左右王汗之襲太祖也太祖與宗親大臣飲班朱尼河水而誓阿海禿花皆與焉既而金人訝其使久不還拘其家屬於瀛阿海殊不介意攻戰愈厲太祖益嘉之妻以貴臣之女給戶俾食其賦金泰和五年進攻西夏累立功明年太祖元年建龍旗卽大位逾數歲詔左帥哲別畧地漠南阿海爲先鋒六年破烏沙堡鏖戰宣平大捷會河遂出居庸耀兵燕都禿花實爲鄉導獲牧馬甚眾八年太祖再克居庸哲別攻下紫荆關阿海請止殺掠事具太祖紀俄駐蹕燕近郊金主懼請和太祖諭其使曰阿海妻子何故拘繫弗遣卽送來歸師還出塞九年金人走汴拜

阿海太師行中書省事禿花爲太傅封濮國公每宴必賜坐命禿花從國王木華黎取中原逾三歲阿海從太祖征西域俘訛答刺酋長只蘭禿其後下蒲華尋思干等城太祖班師還留監尋思干總治西域未幾以疾薨於位年七十三至元十年謚曰忠武禿花與收河北山東論功拜總領也可那顏賜虎符銀印歲賜錦幣三百六十匹故又稱也可太傅焉太宗時命禿花統石抹查刺劉黑馬史天澤三萬戶以守中原薨於西河縣太宗定功臣食邑以上都五百四十戶給其家阿海子三人曰忙兀台曰綿思哥曰捏兒哥忙兀台太祖時佩虎符爲御史大夫監戰左副元帥管領契丹漢軍守中都卒無子捏兒哥太祖時爲右丞行省遼東蒲鮮萬奴叛舉家遇害綿思哥襲太師監尋思干久之乞還守中都路也可達魯花赤佩虎符薨子買哥通諸國語太宗時爲奉御賜質孫服

嗣治中都時供億繁重屢貸於民買哥輒以私財償之事聞賜萬金焉憲宗八年從攻釣魚山卒於軍其妻以哀毀卒特謚貞靜子老哥終中書左丞驥馬備宿衛爲必闔赤擢右衛親軍都指揮使至元二十四年世祖宴於柳林命驥馬居其父位次賜質孫服尋成哈丹禿有功請老子五臺奴中書右丞文謙興國路總管蒙古不花荆湖北道宣慰使虎都不花亦名文炳湖州同知禿花子朱哥嗣父職統劉黑馬等七萬戶與太師都元帥達海紺卜征蜀昭慈太后稱制之年自商州道鶻嶺關出房州竹山以趨三川遂攻瀘州宋人大震尋薨於軍子寶童疾不任事朱哥弟買住嗣而以寶童充隨路新軍總管時憲宗銳意謀蜀買住上言曰蜀之根本在於成都今不爭其上游而但分擊其東不足以制勝也國家已有成都數年而四面皆困於宋未有重鎮以定其地是未知所以

用成都也臣請任其事從之遂帥諸軍駐成都因西攻嘉定以披其勢未下而薨子忽林帶嗣總諸軍立成都府薨以兄百家奴嗣自朱哥至百家奴並襲太傅總領也可那顏禿滿荅兒者百家奴之弟忽林帶之兄也常留中宿衛後詔百家奴解兵柄乃授禿滿荅兒成都管軍萬戶代將其軍累從忽敦汪德臣攻嘉定降之又從忽敦徇下瀘敘諸城進圍重慶禿滿荅兒守合江口又以舟師塞龍門濠斷其援兵瀘州復爲宋將張毅所陷乃解重慶圍以圍瀘州久不下禿滿荅兒夜襲奪其水城黎明先登克之再圍重慶遂破其城論功賜虎符授夔路招討使遷四川東道宣慰使改同僉四川行樞密院事遷四川行中書左丞改行尚書左丞進右丞卒忙古帶寶童之子也世祖賜以金符襲父總管統領山西新軍從也速荅兒征蜀及思播建昌諸蠻以功進萬戶從攻羅必甸詔

以其眾入緬迎雲南王也先帖木兒金齒白衣荅奔諸蠻往往伏險要爲害忙古帶奮擊破之十餘戰始至緬開金齒道迎王以還遷副都元帥成宗卽位授烏撒烏蒙宣慰使兼管軍萬戶徙大理金齒宣慰使都元帥討平烏撒及羅羅之叛賜金鞍轡弓矢鈔銀復討普安羅雄叛蠻克之進遙授雲南左丞卒於軍至大四年贈龍虎衛上將軍平章政事濮國公諡威愍子火你赤襲萬戶

阿朮魯一曰脫侖曰朮忽魯曰也速魯曰脫或欒曰掇忽蘭曰脫忽闌斡魯納台氏元同姓也早事太祖得同飲班朱尼河水太祖卽大位錄其功以爲千戶充閭里必太祖圍金中都還賜銀印命阿朮魯總兵南征旋從哈撒兒王取女眞北地拓地過黑龍江還賜以金甲珠衣寶帶太祖征西夏避暑六盤山命阿朮魯總兵攻之阿朮魯及夏人大戰於合刺合察兒夏人勢蹙乞降阿朮魯遂

執夏主覲以獻太祖命盡以夏主遺物賜焉阿朮魯進兵圍金慶陽太宗二年與金人戰失利解圍還太宗尋命阿朮魯總諸將南伐時金滄海公張進獨守信安不下阿朮魯遣楊傑只哥說之來歸既復遣張榮等擊破睢陳之兵與攻汴師應會金徐邳宿三州納款於降將國安用阿朮魯大怒曰三州吾當取之安用何人敢擅受降乎乃遣張進入徐州欲圖安用安用知之於是遂劫殺進而據三州叛附於金五年阿朮魯帥師攻歸德歸德降明年攻沛國安用救沛敗走徐州並破滅之阿朮魯遂以次收邳宿等州太宗第諸將功以真定一百六十九戶爲之食邑十年張子良以泗州各城歸阿朮魯無何請老國王塔察兒乃以其子不花代領其軍不花卒子幼兄子懷都襲懷都從合必赤大王破李璮功最賜金虎符充邳州監戰萬戶領山東路統軍司復從阿朮魯征襄陽西

渡漢江宋水軍絕其歸路懷都選士浮水戰奪其二十餘艦斬首千餘級樊城有古城堡高七層懷都夜勒士卒親冒矢石攻奪之樊城既下襄陽亦降懷都帥師屯蔡息出巡淮安還城正陽宋將夏貴來攻逆戰卻之伯顏帥大軍伐宋懷都南渡江敗宋兵於無錫復以行省檄領軍護焦山江岸復渡江立木城於揚州灣頭命權樞密院事復守鎮江屢提兵戰於蘇常尋徇秀州仍撫治臨安迤東新附軍民進徇溫及福建以功授浙東宣慰使慶台叛懷都與之戰於黃花嶺又戰於溫州白塔屯進至漳泉及興化平之至元十六年召至闕賜玉帶弓矢授福建參知政事至處州以疾卒子八忽答兒官至浙東宣慰使都元帥平浙東建甯盜賊數有功不花子忽都答兒既長分襲蒙古軍千戶從平宋授浙西招討使改邳州萬戶終行省平章政事初太祖未平克烈勢猶未盛凡同

飲班朱尼河水十九人皆與共艱難經綸草昧之臣也太祖以飲水爲帶礪之盟俾賞及苗裔焉然史文闕漏今可知者惟十六人而已而搠只哈兒王及其子脫歡爲懿親事在烈祖四王傳孛禿爲駙馬在世戚傳速不台列於四先鋒名最著亦別有傳其自鎮海札八兒二耶律阿朮魯外曰雪里堅那顏曰哈散納曰紹古兒曰忽魯渾曰懷都曰塔海拔都兒功皆不甚顯然亦次第錄之至懷都則見其子速哥傳塔海拔都兒則見其孫阿塔海傳忽魯渾則見其孫也速鶻兒傳云

雪里堅那顏徹兀台部族也從太祖征王汗同飲班朱尼河水以功授千戶領徹兀台部征討諸國留防河西卒子麥吉襲千戶從太宗定中原卒子麥里襲麥里從定宗畧定欽察阿速斡羅思諸國復從憲宗伐宋皆有功至元中大名王禾忽反掠河西諸城麥

里與其弟柔忽答兒帥所部擊之一月八戰奪禾忽所掠札刺兒塔塔刺諸部民以還已而柔忽答兒爲禾忽所殺世祖聞而憐之遣使以銀鈔羊馬迎致麥里賜號曰答刺罕尋卒哈散納怯烈亦部族也太祖時征王汗同飲班朱尼河水後管領斡兒寒河軍從太祖征西域下蒲華尋思干等城太宗時仍領本軍並回回人匠三千戶駐尋麻林尋授平陽太原兩路達魯花赤卒子捏古伯襲從憲宗攻釣魚山有功卒子撒的迷失襲卒子木八刺襲木八刺充貴赤千戶遷西域親軍副都指揮使大德元年卒弟禿滿答兒襲卒子哈刺章襲

紹古兒蔑里乞部族也太祖時同飲班朱尼河水扈從親征太宗命從阿朮魯討信安畧地河北賜金虎符授洺磁等路達魯花赤尋收河南命領濟南大名信安等處軍馬復從國王塔思伐宋憲

宗元年卒子拜都襲卒子忽都虎襲徙睢州從世祖渡江攻鄂還鎮恩州中統三年從哈必赤大王征李璮尋命立邳州城領兵鎮兩淮至元時從丞相伯顏渡江又從參知政事董文炳沿海出征還鎮嘉興行安撫事改嘉興總管府達魯花赤遷黃州宣慰使改浙西加招討使征占城以其國降表貢物入見帝嘉賚焉復從鎮南王脫歡征安南還授邳州萬戶三十年卒阿朮魯偏將復有張榮楊傑只哥之屬榮自有傳楊傑只哥本小字只哥或竝字呼之大興寶坻人初太祖畧地燕趙以族屬來附從攻遼左及從總帥阿朮魯定西夏有功阿朮魯知其才與裁決軍務從攻信安信安四面阻水傑只哥曰彼恃巨浸我師進不得利退不得歸不如說之因往見其帥張進進見之怒曰吾已斬二使汝不懼耶傑只哥神色自若從容言曰今齊魯燕趙地方數千里郡邑聞風納降君

獨恃一城內無軍儲外無兵援君謂吾不懼死吾爲君計恐未能不懼也盍降乎進默然曰姑待之凡三往乃降太宗三年師次徐州阻於河傑只哥知敵藏舟草澤間爲伏兵因襲擊之而奪其舟遂得渡獲河南諸郡降人三萬餘戶徐州叛將國安用擁眾來戰傑只哥以百餘騎突陣大敗其軍皇太弟國王幹嗔駐兵河上見之賜名八都兒授總管新附軍民佩金符五年復從阿朮魯攻歸德傑只哥縛草筏渡濠梯城先登遂克之由是進攻得五州十縣四堡二寨俄而宋兵至已登歸德城傑只哥拒戰敗之帥舟師追擊轉戰中流溺死太宗特賜種田民戶租賦以贍其家子孝先僉江北淮東道肅政廉訪使孝友鎮江路總管

論曰國家草昧之初則必有與共艱難之臣何則非濟險出屯則不足以建侯而經綸於天下也故鎮海札八兒諸人之功偉矣身

卷三十三
元書
爲佐命澤被子孫宜哉耶律懷貳忝竊良時以成其名幸矣豈天之啟之歟抑金之遺才與敵也

趙厥新 創

劉崑森 判
門人曾校襄校

元書卷三十三

門人曾士琮詳校

元書卷三十四

邵陽曾廉譔

哲別速不台郭寶玉札刺兒帶忒木台列傳第九

哲別別速台氏元同姓也國初官制簡古惟稱哲別那顏而或曰者別曰遮別曰只別曰柘柏曰折不那演者必那演或止稱別那顏折那顏實一人也始哲別爲泰赤烏部將太祖與泰赤烏諸部戰於闕奕壇哲別射太祖馬斷其項骨尋泰赤烏敗亡哲別來降太祖欲殺之哲別曰汗欲圖天下奈何殺壯士乎太祖乃笑曰汝能以事汝主者事我不愧人臣矣遂赦使將兵哲別初本名只兒豁阿歹太祖賜之名曰哲別以其善箭哲別言箭也太祖出征諸國哲別常爲先鋒及卽大位以爲千戶太祖五年伐金以爲左帥略地漠南破烏沙堡明年金繕烏沙堡哲別復攻破之並克烏月

營又克居庸關抵中都襲金羣牧監驅其牧馬而還尋命攻金東京不克用槊直臍魯華計陽引去而夜馳還襲之遂克東京事具梨直臍魯華傳八年太祖旣入居庸趣燕哲別西克紫荆關金監軍高琪軍潰遂拔涿州其後太祖親征乃蠻遺孽哲別仍爲先鋒是時屈出律之軍已至於阿力麻里將東犯哲別連戰皆敗之進破其眾於谷則斡兒朵旣又受曷思麥里之降曷思麥里谷則斡兒朵人初爲西遼主近侍者也至是以可散八思哈城歸國哲別知屈出律新篡人國而曷思麥里西遼舊臣有仇讎心且知乃蠻虛實卽用爲鄉導將一軍以先曷思麥里果馳斬屈出律於巴達哈傷哲別令持其首以徇契丹遺族皆降十四年太祖親征回回哲別與畏吾兒兵先進太祖命舍尋思干勿攻而西趣蒲華蒲華下哲別復東會太祖以夾攻尋思干克之滅里鎖潭汗西奔太祖

使哲別及速不台急躡之渡灰里河滅里遂走死小海中會欽察旣降復叛太祖怒焉於是乃遣使趣哲別疾馳以討欽察哲別出小海西北復帥曷思麥里招降海上數城進兵敗谷爾只及阿速之師遂渡乞則里入海進擊斡羅思於鐵兒山效敵衣襪草山而前因風焚蒿煙燄漫空敵眩惑不知所爲哲別與其將郭德海遂乘之斬首三萬級虜其密赤思臘是時太祖已遣朮赤太子節度其軍卽以爲欽察汗哲別使曷思麥里獻俘太子於是取道康里國至孛兒八里敗其酋霍脫思罕虜之康里旣下遂征欽察十九年平欽察而還於是朮赤遂留王欽察矣哲別之西追滅里也帝亦使曷思麥里從八刺東追其子札闌丁戰敗之於阿刺黑又敗之於禿馬溫山又敗之於憨顏城於是札闌丁奔欣都思曷思麥里取玉兒谷德痕城並克憨顏而還尋復從哲別西征哲別嘗奏

諸太祖數盛稱其功世以是多哲別能推賢也哲別俄卒於軍或曰哲別子孫後遂留仕欽察曷思麥里後從帝征河西太宗時從攻汴皆有功累官河南二十八處都達魯花赤卒子密里吉襄世祖時從攻淮西與宋戰死

速不台亦曰雪不台曰速不歹曰速不解曰速別額台兀良合氏族也初其先捏里必居斡難河上與敦必乃汗深相結生子曰孛忽都眾目爲折里麻言有謀畧人也是生合赤溫合赤溫生哈班哈班生忽魯渾速不台俱驍勇善射太祖在班朱尼河哈班驅羣羊以進遇盜執焉二子繼至槍亦將及反鋒以刺人馬俱踣遂免父難羊得達行在所速不台與父兄俱與飲班朱尼河水遂以質子事太祖每戰常爲先鋒太祖卽大位以爲千戶從伐金攻桓州先登拔其城賜金帛一車蔑里乞餘族復保太和嶺東太祖命速

不台討之遂殄其眾並降欽察事貝蔑里乞傳太祖十七年可弗又滅里鎖潭汗西奔命速不台及哲別追之及於灰里河哲別戰不利速不台駐河東戒其眾人爇三炬以張軍勢滅里夜遁復以萬人由不罕川必里罕城追之累經無水之地旣渡先發千人爲游騎繼以大軍晝夜兼行比至滅里逃入小海病死盡獲其珍寶以獻太祖嘉焉賜以大珠銀器明年速不台以哲別奉命討欽察已昔嘗伐之而未竟其功也乃請繼哲別以行許之速不台反自北繞寬田吉思海展轉至太和嶺鑿石開道出其不_意其酉玉里吉及塔塔哈兒方聚兵不租河而速不台已至縱兵奮擊矢及其首玉里吉子逃於民間其奴告而執之會哲別之師南自康里而至遂收其境於是速不台之師乃南至阿里吉河斡羅思大小密赤思臘來拒戰一戰降之略阿速而還見太祖於西域速不台已

縱告主之奴爲民太祖命戮之以其不忠於主也速不台請以蔑里乞乃蠻克烈欽察諸部千戶通立一軍從之遂略也迷里霍只獲馬萬餘匹獻焉復從征西夏命度大磧以行政下撒里畏吾兒及答林赤閔乃入自玉門關克河州洮州遂與太祖師會復獻牝馬五千太宗卽位多其功命尙禿滅干公主三年從拖雷太子經理河南敗金師於三峯山多用其謀事在太宗紀明年太宗及拖雷太子北還留速不台統諸道兵圍汴其歲金主渡河北走追敗之於黃龍岡斬首三萬級明年汴降速不台俘其后妃及寶玉以入朝時汴久受兵大饑人相食速不台下令縱其民就食河北七年拔都大王征欽察太宗聞其酋八赤蠻有膽勇因以速不台爲先鋒八赤蠻聞速不台來而懼遂逃入寬田吉思海虜其妻子而還十三年復從拔都克幹羅思進攻馬札兒國速不台領一軍與

拔都旭烈兀昔班合丹諸王五道並進馬札兒酋怯憐軍於漷甯河西速不台知上游水淺且有橋敵必嚴備乃欲於下流深處結柵潛渡以繞出其後已而諸王軍先涉爭橋反爲怯憐所乘沒數十人速不台至怯憐亦退去諸王各欲歸速不台曰我不至禿刺河馬札城不還也遂同進師拔馬札城而還於是諸王皆曰速不台功也是歲太宗崩逾二歲諸王大會立定宗拔都欲不往速不台曰大王於族屬爲兄安得不往明年遂赴會定宗卽位旣朝見還家於禿兀刺河上三年卒後贈效忠宣力佐命功臣開府儀同三司上柱國河南王謚忠定子曰兀良合台曰闊闊帶闊闊帶官蒙古都元帥

兀良合台一曰兀良哈解初事太祖時憲宗爲皇孫尙幼以兀良合台世勳家使護視之憲宗在潛邸遂分掌宿衛太宗五年領兵

從定宗討蒲鮮萬奴遂至女真繼從拔都大王征欽察及斡羅思
孛烈兒定宗元年又從征孛烈兒及乃捏迷思皆平之既而定宗
崩失烈門立未及會憲宗之立大會諸王大將兀良合台有助焉
明年世祖以皇弟總兵征大理兀良合台自西道出晏當路與世祖同趨麼些
師自臨洮至忒刺分三道世祖自中道出成紀鎮抄合也只烈大
王自東道出姚府兀良合台自西道出晏當路與世祖同趨麼些
蠻城兀良合台渡金沙江蠻降遂破龍首關入大理世祖還明年
大理西方各納款兀良合台乃東征別部善闡善闡大酋高昇西
走羅部集兵拒戰兀良合台分兵大破之湊可浪山下而親逼押
赤城押赤城者善闡城也城三面際滇池險不可克乃大震鼓鉦
時止作以惑之經七日知其困怠而潛師大破之未幾悉下乾德
哥赤禿哥諸城及阿魯阿宿諸國出師二歲凡大理五城八府四

郡烏白蠻三十七部俱平六年引兵出烏蒙趨瀘江剗禿刺蠻三
城卻宋兵三萬奪其船二百遂通道於嘉定重慶抵合州濟江與
鐵哥帶兒師會明年兀良合台入朝請依漢故事改西南夷爲郡
縣從之帝乃厚賚其軍拜兀良合台大元帥授銀印還鎮大理兀
良合台自六盤復出臨洮至鎮遣使招降安南不報遣兵壓其境
安南王陳日張隔洮江列象騎步卒甚盛兀良合台分兵爲三隊
使先鋒徹徹都自下游先濟戒之曰汝勿與戰俟吾後軍至汝卽
奪其船蠻必爲我禽也徹徹都違戒蠻雖大敗得舟逸去兀良合
台怒曰先鋒違我節度軍有常刑徹徹都懼自殺師入安南日張
已逃入海兀良合台於是置酒大饗軍士還押赤城八年並錄速
不台功分汴梁千有百戶爲食邑兀良合台以安南納款已感病
將北旋而戰馬爲蠻所掠偵知有三寨藏馬山顛盡獲之乃屠押

赤城會憲宗遣使諭旨約明年正月至潭州會師乃帥四王騎兵三千蠻僰萬人破橫山寨老蒼關敗宋兵六萬乘勝蹴賓州象州入靜江府九年破沅辰抵潭州兀良合台自入宋境轉鬪數千里未嘗敗北及至潭與宋制置使向士壁戰於南岳市復以兵邀其歸路兀良合台乃堅壁城下逾月世祖渡江傅鄂州遣鐵邁赤以鐵騎來迎師乃北還明年世祖卽位兀良合台朝見於上都至元八年卒後贈太尉開府儀同三司河南王謚武毅子阿朮自有傳

郭寶玉字玉臣華州鄭人也通天文兵法善騎射金末封汾陽郡公兼猛安大安三年童謠曰搖搖罟罟至河南拜闕氏旣而太白經天寶玉歎曰北軍將南天改姓矣明年金以寶玉從行省千家奴胡沙守禦烏沙堡方築壘行省不設備而左帥哲別軍至千家

奴胡沙皆走寶玉舉兵降太祖見之問取中原之策對曰中原勢大不可忽也陛下如欲得中原不若先用兵西域藉諸番勇悍以圖金可覆也寶玉又勸帝頒行新令語在太祖紀太祖乃授寶玉以抄馬都鎮撫未幾太祖患乃蠻遺孽屈出律之奪西遼而勢將復振也九年知金勢已衰乃以石抹明安圍中都木華黎取北京而親帥師討屈出律於谷則幹兒朵城寶玉從哲別先驅破其兵三十萬寶玉傷於胸太祖命剖牛腹溫之少頃乃蘇而屈出律復東據別失八里堅守以抗國兵寶玉復與戰敗之下其城已而屈出律爲哲別所斬乃蠻平而是時可弗又滅里鎮潭汗方乘乃蠻之竊西遼奪其嶺西地據尋思干太祖以中原方有事隱忍之遂班師寶玉復從木華黎攻取山東河東諸城太祖以滅里好事頗生邊釁亦憶寶玉昔言西域事而患其城多山險不可攻因召

寶玉問之對曰彼城不在天上何險之足云乎於是太祖意決十四年遂親征回回寶玉從攻別石闢克之次忽章河滅里列兩陣迎拒戰方酣寶玉望其眾疾呼曰彼走矣回回大驚駭果走追殪之進克尋思干城滅里南走入鐵門關帝尋收軍還忽章河北而滅里子札闢丁復入尋思干城帝再渡河則札闢丁退扼鐵門關寶玉及察罕攻破之滅里父子復拒守阿母河陳船河中而築壘南岸以護之寶玉因風縱火焚其船破其兵五萬斬其大將佐里於是滅里札闢丁皆震怖遁避滅里西入海中而死語在哲別速不台傳札闢丁東走大雪山思歸可弗又寶玉從太祖至大雪山札闢丁卒不能守可弗又遂奔欣都思寶玉復從速不台收北海欽察諸國以功累遷斷事官卒於賀蘭山子德海德山德山以萬戶破陝州攻潼關卒

德海字大洋姿貌奇偉亦通天文兵法金末爲謀克擊宋將彭義斌於山東敗之既知父寶玉北歸遁至大行山國兵至乃出降爲抄馬彈壓從哲別西征大敗斡羅思於鐵兒山事在哲別傳尋哲別使德海別將踰雪嶺西北萬里至答里國平之踰數歲引軍還復擊可弗又王子札闢丁於崕山斬之其後從元帥闔闢出游騎侵關中金人閉關拒守德海引驍騎五百襲風陵渡寨斬關入殺守者三百人後兵不至引還復進破南山八十三寨陝西平後德海導大將魁欲那拔都假道漢中沿漢水而東與金武仙軍十萬遇於白河德海提孤軍轉戰斬首二萬級拖雷太子敗金師於三峰山德海軍亦至有功焉已又破鄧州行省完顏思烈兵於京水走樞密使赤蓋合喜於中牟遷右監軍復追敗金師於黃龍岡南京平金故將李伯淵殺降將崔立以應宋趨汴之師德海往討之

足傷礮歸而卒先是德海嘗言於太宗請試天下僧尼道士並置學廩育人才立科目選之入仕其後帝命選釋道精通經文者千人有能工藝者則命小通事合住等領之餘皆爲民及耶律楚材請試儒士議皆發於德海也子侃

侃字仲和幼爲史天澤所器留家教養之弱冠爲百戶從天澤破金將白撒兵於新衛州侃遂渡河追金主至歸德敗其兵於闕伯臺累功爲千戶憲宗二年送兵仗至和林改抄馬那顏從旭烈兀大王西征侃爲人鷙勇而善謀旭烈兀悉以軍事委之侃爲之前驅是時回回諸國以八哈塔舍里發爲其大酋猶天子也諸素丹各王其國猶諸侯也而木刺夷最以強聞又恃其城皆居山險先是拖雷太子大掠其國而未能服之也故尤桀鷙侃計當先破木刺夷以示國威用兵三年卒下其城而屠其人事在西域傳初八

哈塔爲搠兒馬罕所攻始入貢搠兒馬罕卒地遠職貢遂絕侃知八哈塔立國久兵多守險要而未可猝下也乃引兵過你沙不兒而入西山中攻阿刺丁城克之西山者古云尼山縣五千數百里者也阿刺丁城在山中又西則乞石迷八哈塔北方巨鎮也侃至而降於是已拊八哈塔之背遂自山中出攻八哈塔城又知合里發將以舟遁乃預設浮梁備之合里發果登舟猝見浮梁乃自縛以降然其將紂答兒已遁去侃追之至暮諸軍欲頓舍侃不可又行十餘里乃止夜暴雨先所舍處水深數尺明日獲紂答兒斬之於是回回失宗主矣再西至天房其將往石約降侃知其詐嚴備以待遂大破之降其國進至密昔兒方日暮已止營復驅兵起徒幕焉乃下令軍中銜枚傳箭敵不知也潛軍夜來襲而失侃所在可乃素丹曰東天將軍神人也驚懼亦降旭烈兀使侃西渡海收

富浪兀都素丹見之曰吾夜夢神人乃將軍乎卽自納款師還西南海上石羅子賓鐵兀林乞里彎皆降焉凡侃所得回回三十餘國西域平旭烈兀使侃歸報捷至釣魚山憲宗已崩侃遂就天澤軍屯田於鄧世祖卽位侃上疏陳建國號築都城立省臺興學校等二十五事擢江漢大都督府理問官李璮反宋將夏貴以兵應璮帝以史天澤薦召侃賜尚衣弓矢使備邊侃屢敗夏貴兵奪還所掠萬餘人會天澤解兵柄侃亦調同知濰州上言淮北可立屯田三百六十所徙高堂令兼知夏津武城等五縣邑人吳乞兒濟南道士胡玉反討平之復改白馬令僧臧羅漢與彰德趙當驥反又平之初侃疏言宋據東南以吳越爲家其要地則荆襄而已若先取襄陽置揚廬勿攻而直趨臨安是疾雷不及掩耳江淮巴蜀不攻自平矣帝以侃習兵擢爲萬戶使會兵襄陽從伐宋侃由陽

遷上游渡江江南平亦頗用侃策遷侃知甯海州一歲卒侃行軍有紀律野爨露宿雖風雨不入民舍所至興學課農吏民畏服焉三哥亦曰三摸合曰三哥拔都亦曰撒沒合史失其氏族太祖九年解中都圍北還金主遂遷汴中塗而紇軍反來求援帝命三哥率禿及石抹明安帥師南征出古北口遂圍中都乃立行尚書省於宣平以三哥領之統金降民明年中都拔三哥實首帥也事具明安傳十一年三哥及撒里兀解帥師越西夏趨關中遂越潼關至澠池皆殺其守將會金花帽軍遇之於杏花營三哥乃自陝州渡河復與金行省胥鼎戰不利引還時金主來乞和帝欲許之謂三哥曰譬之獵吾已取其獐鹿惟存一免盍舍諸三哥恥無功不欲和乃言必金去帝號金人亦不可遂已於是金御史臺乃極言三哥不復叩汴京索戰但以游騎遮截道路而以別兵攻擊州縣

是亦困汴京之漸若諸城不復犄角而專守汴京則中都之圍必復見今日矣其後木華黎數越天河國兵竟克汴皆三哥遺策也札刺兒帶亦曰札刺台亦曰札刺亦曰合台亦止稱札刺蒙古札刺兒部族也太祖十三年爲副元帥同元帥哈眞及遼王耶律留哥征契丹叛人咸舍於高麗哈眞者亦曰合臣亦曰哈只吉亦實一人也初乞奴金山統古與咸舍皆留哥之屬乘留哥北觀據遼東以叛既而爲蒲鮮萬奴所逼走遼南又竄入高麗事在留哥傳高麗以咸舍之擾其國而樂大軍之進討也於是其王瞰奉牛酒迎師亦使其樞密使趙冲帥兵同破咸舍於江東城札刺兒帶乃與冲結爲兄弟而說高麗歲輸貢賦明年高麗以方物進獻東海始藩矣然高麗叛服無常太宗數遣將征之久之始以族子縛入質歲貢又不時入憲宗四年乃起札刺兒帶爲元帥統洪福源耶律

石刺諸軍以征高麗憲宗以札刺兒帶太祖舊臣乃命諸王也苦忽刺出等並聽節制札刺兒帶多權略威重有望旣爲大將遂督諸軍克光州忠州等城經數歲屢攻其城邑破之八年高麗王瞰窮蹙乃降遣其世子僕入侍高麗事定札刺兒帶乃還卒于塔出以勤臣子累遷官遼東宣慰使入覲世祖問塔出太祖昔命爾父札刺兒帶聖旨汝記之否塔出應對如禮帝嘉之賜以玉帶弓矢拜東京行省左丞尋復爲遼東宣慰使勢都兒大王將附乃顏以叛塔出遣人馳驛告變命領萬人與愛牙赤大王同力禦之而乃顏結女眞水達達官民等亦與勢都兒合遂犯咸平塔出從愛牙赤自瀋州合軍進討射殺其將數人咸平獲全復追其餘眾北至金山大敗之賜黃金珠璣錦衣弓矢鞍勒加賜明珠虎符充蒙古軍萬戶復統軍討合丹於女眞合丹涉海南襲高麗塔出復會諸

軍討平之賜珠衣拜平章遼陽政事卒官子荅蘭帖木兒終參知遼陽政事

撒禮塔亦曰撒里答曰撒里台初事太祖事軼太祖季年爲元帥統王榮祖等軍征遼東太宗元年復命吾也而從征是時金遼東行省葛不靄惟守婆速府撒禮塔自蓋州進征揮兵逼之初蓋州已被破於木華黎後復入金撒禮塔遣榮祖攻破之遂破宣城等十餘城葛不靄走死而金將郭琛完顏曳魯馬趙遵李高奴等以餘眾復據石城撒禮塔破石城曳魯馬戰死遵高奴出降遼東平太宗以高麗前殺使者罪命復統吾也而王榮祖移刺買奴以征之至西京神騎都尉洪福源迎降得所率民戶千五百旁近州縣亦多來歸者撒禮塔皆拊循之分兵下雲宣龍泰等城而遣阿兒禿與福源進至王京招其王瞰瞰遣其弟懷安公併請和許之撒

禮塔置京府州縣監七十二人而還既而高麗復叛撒禮塔復進兵深入其國南至處仁城攻之中流矢卒

忒木台亦曰忒沒解札刺兒氏元同姓也祖豁火察驍果善騎射太祖出征每爲前驅父朔魯罕有膽勇野狐嶺之戰中流矢戰益力克之還太祖親往撫視竟卒太祖悲悼曰朔魯罕吾一臂今亡矣賜其家馬四百匹錦綺萬段忒木台從哲別乃顏征康里俘其部長以獻還從太祖征河西有功特命行省事領兀魯忙兀亦乞列思宏吉刺札刺兒五投下軍太宗伐金圍河中使拖雷太子自興元而東忒木台領前鋒出好水谷金主欲徑救河中以掣漢上之勢而移刺蒲阿言須防冷水金帥旣燬太宗遂圍汴忒木台復帥師斃其東肖乃台執金行省慶山奴以見忒木台忒木台誘之使招南京不從遂殺之攻拔金睢州圍歸德忒木台晝夜攻城不

能下或獻策令決河以灌城河决而水至城西南入故睢水則反以水爲固忒木台遂舍去圍亳州而日遣兵薄歸德復爲金元帥蒲鮮官奴所給軍幾覆卒與大將阿朮魯降歸德定河南金亡復從曲出太子伐宋入棗陽忒木台又別將入漢陽境所至皆好屠戮尋攻江陵爲宋將孟珙所拒而還太宗分封功臣並錄忒木台先世功賜食太原二千戶忒木台雖無大將畧而猛鷙不減阿朮魯又善待降民嘗駐軍太原平陽河南土人德之皆爲立祠子奧魯赤初事憲宗爲火兒赤特見親任憲宗令核太原戶數存七百餘以與奧魯赤世祖使攻襄陽授金符爲蒙古軍萬戶明年換虎符襲父職領蒙古四萬戶大軍伐宋至鄂奧魯赤入城諭守將張晏然降宋平拜行省參知政事行湖北宣慰使時州縣初附戍以重兵民驚懼往往逃匿山澤間奧魯赤止侵暴恤單弱號令嚴明

民悉復業會詔所在括逃俘有司拘男女千餘人時軍士已還部所括者無所歸眾議悉以隸官奧魯赤曰斯民不幸避兵幸而骨肉完聚復羈之是重被兵也不若籍之爲民眾從之進左丞仍行宣慰使而移駐潭州平湖南劇賊周龍張虎誅其首而縱其餘轉右丞改荆湖行樞密副使遷湖廣平章政事佐鎮南王脫歡征安南時分軍爲三道奧魯赤從王出東道女兒關遂入安南國都已而班師安南遮扼歸路奧魯赤力戰乃自壘州閒道以出事具南蕃傳旣而移江西平章政事大德元年卒謚忠宣子拜住官蒙古侍衛親軍副都指揮使脫桓不花湖廣左丞河南蒙古都萬戶曰普荅刺吉河南右丞同知行樞密院事蒙古萬戶曰特穆實南甯軍達魯花赤脫桓不花子察罕鐵穆爾襲爲河南江北蒙古軍都萬戶

達海紺卜或止稱塔海太宗時爲太師都元帥督諸軍征蜀會闍端太子之師斬曹友聞於大安太子北還達海紺卜帥眾號八萬東下欲自施黔以入湖湘宋將孟珙禦之於歸峽不能下達海紺卜復遣土猝汪世顯等入成都斬陳隆之分兵破遂甯瀘敘等州蜀之分崩始於達海紺卜

論曰哲別速不台之功偉矣哉漠北旣平遂極月嶧郭寶玉降虜遂爲佐命父子祖孫皆功在西陲又何傑也太祖太宗時大將若三哥拔都阿朮魯太赤忒木台札刺兒帶撒禮塔忽都忽達海紺卜之屬皆得專方面阿朮魯忽都忽自有傳太赤見其孫徹里傳及忒木台札刺兒帶皆未能深悉其顯績也亦史文之過畧矣況三哥撒禮塔達海並其家世而軼之哉余屢求之而終無徵也故且附焉

曾人翰

趙厥新 刊

劉崑森

門人曾廣休襄校

門人曾士琮詳校

元書卷二十四

元書卷三十五

邵陽曾廉譔

史天倪董俊石天應列傳第十

史天倪字和甫大興永清人也曾祖倫以俠名河朔大爲諸郡所歸重倫卒河朔人爲之社曰清樂以祠倫焉父秉直尚氣義太祖八年萬戶木華黎南伐拒者皆屠滅秉直懼乃帥親黨數千人詣涿州軍門降木華黎卽以秉直管理降人家屬屯霸州秉直善拊接附者至十餘萬家尋遷之漠北降人道飢秉直得所賜牛羊悉分食之十年吾也而爲北京都元帥秉直行尚書六部事於北京主餉饋太宗時卒天倪頗事誦讀金大安末嘗舉進士不第而狀貌魁偉木華黎見而奇之令將降卒從征山東還天倪乃選於清樂社得壯勇萬人皆樂相從也天倪因名之曰清樂軍帥以略三

河薊州諸寨皆望風歛服明年朝太祖於燕郊得賜金符授馬步軍都總管天倪因進計於木華黎曰金棄燕遷汴失策之大者也夫遼水東西諸郡金之根本也今莫若取大甯以扼其喉襟則金雖有遼陽不能守矣遼陽得而後進攻河南無後患也木華黎善其策遂請進兵降高州攻北京數月降之時木華黎以用兵於遼東西事方殷詔授天倪右副都元帥易金虎符帥師南征天倪會中都軍攻平州金提控完顏合達降十一年遂移師而西是時金將武仙方破石海據真定天倪攻之不能下以兵旁收其屬邑而合達復叛以其眾浮海歸金金益都元帥蒙古綱遣兵迎之天倪乃邀之於樂安大敗其眾遂徇山東諸郡還圍大名眾謂城堅不可破天倪先登破之明年洺磁邢沃威州中山皆降於是木華黎旣平遼封國王專南伐十四年天倪復從徇河東至絳州其團樓

甃以石攻之牢甚天倪乃教卒穴其旁樓虛遂陷因拔其城木華黎賞以繡衣金鞍名馬明年木華黎復自中都南徇地武仙遂降木華黎承制以天倪爲金紫光祿大夫河北西路兵馬都元帥行真定府事仙副之十六年天倪西出師取澤潞懷州十八年師臨衛州攻之不克十九年宋大名總管彭義斌舉兵犯河北天倪逆擊之於恩州敗去而武仙已受金樞密院牒招之歸又潛通義斌與之合明年天倪還仙遂僞設宴而害天倪行軍有紀律徇山東時部卒殺民豕立斬以徇軍中肅然木華黎旣下真定天倪進言曰今中原粗定而仍從剽掠非王者弔民伐罪意也且王奉命爲天下除暴豈可效他軍所爲乎木華黎遂下止殺之令天倪所啟也平日常坦懷待人一無疑忌旣帥真定經厯王守道覺武仙有異啟天倪爲備天倪欲以誠信結仙不應竟以是受禍聞者

悲之天倪死妻程氏遂自殺子五人喪其三其存者曰楫曰權以從秉直於北京免未幾天倪弟天安天澤皆舉兵爲復讐討仙破走之天澤遂代天倪爲都元帥終右丞相自有傳

楫字大濟太宗命知中山府遷征南行軍萬戶天澤乃上奏曰臣兄天倪死事二子時幼故臣攝其任今楫已成當以職廸授也帝嘉天澤能讓而不許其辭乃命楫爲真定兵馬都總管佩金虎符楫兼有吏幹數發議塞言利之寶而請立銀鈔相權法時以爲便人有譖其府僚者質之無實法將抵罪楫爲之請曰誅之當其罪不若宥之愧其心也其人竟獲免世祖立授真定路總管同判本道宣撫司事楫專制真定三十餘城謹身率眾任賢汰墨脩政令信賞罰矜恤獎獨所舉州縣佐史有文學者三十餘人後皆知名會天澤爲宰相以時議請罷史氏軍官以先天下楫卽日解綬詔

以武仙第賜楫俄以疾卒於家子炫常德管軍總管輝知孟州燧同知東昌府煊潼關提舉燭僉廣西按察司事

權字伯衡憲宗初天澤改官河南經畧使權代爲萬戶屯田鄧州世祖攻鄂北還以權總大兵留鎮武磯山中統元年軍還賜金虎符授沿邊鎮守諸軍總管萬戶明年拜江漢大都督三年詔帥師赴燕俄以例罷兵柄解官至元六年帝以權久在鄧熟邊事召問征南之策對曰襄陽者江陵之藩蔽而樊城又襄陽之外郭也臣以爲先克樊城則襄陽自下然後駐兵嘉定耀武淮泗此常山蛇之勢也帝善之後皆如其言詔復以權爲真定路總管兼府尹徙東平又徙河間卒官謚武穆

天安字全甫天倪爲列將天安爲質於木華黎軍中從畧地鄜州禽金驍將張資祿所謂張鐵槍者也天倪被殺天安率眾自北京

至真定會天澤併力攻武仙破走之授行北京元帥府事撫治真定宋人遣趙和行閒城中稱其倅李甲劉清嘗輸欵武仙爲內應天安覺其詐執和斬之太宗四年從伐金還討平劇盜梁滿蘇傑之亂六年權真定萬戶佩金符賜黃金白狐裘牝馬百憲宗時卒子樞字子明蚤歲知中山府憲宗籍新軍天澤奏以爲征行萬戶成唐鄧憲宗師入蜀樞從天澤朝於大散關帝勞之樞對甚壯是時宋劍州徙治苦竹隘地險絕宋恃之而不設備樞偵知其疏失以聞帝趨樞急進而宋人降翼日大宴帝顧皇后賜樞酒曰朕多樞功此禮國家向未有也明年從天澤破呂文德賜黃白金及匹錦世祖卽位擊阿里不哥討李璮皆從天澤以行嗣復爲左壁總帥援開達州以拒宋人又爲鳳州經畧使及洪茶邱討高麗叛人於珍島皆有功丞相伯顏伐宋樞從賜錦衣寶鞍弓矢甲馬宋平

署安吉州安撫使樞以威信示依險自保者皆復業爲民移病還久之復拜山東東西道宣慰使卒官子煥後衛親軍都指揮使佩金虎符煌秘書少監初秉直降時與其弟進道懷德同謁木華黎進道字道遠初從木華黎下山東太祖九年從攻北京明年城降復與天祥同攻興州克之授義州節度使命管領北京勾當十二年從木華黎拔錦州令帥偏師討廣甯守將劉炎降木華黎就令留鎮廣甯未幾詔以爲北京留守而秉直以尚書蒞北京史氏率以是爲歸宛然家矣進道爲治尙簡樸民甚安之太宗六年請老薦其甥北京管民長官張之翼自代從之間居十年以疾卒懷德木華黎使領黑軍隸帳下子天祥

天祥初從父軍中爲都鎮撫選降卒勇者二百人使領之天祥招徠壯佼得萬餘人從木華黎取中都南地至於沂密賜銀符九年

從攻北京懷德先登中流矢死焉明年北京降木華黎遣分攻傍
近諸寨所得降將皆請而釋之以招諸未降者於是樓子崖數十
寨皆下得老幼數萬勝兵八千西乾河撻魯恃其強獨不降天祥
從吾也而再興師始破平之事具吾也而傳天祥以功授西山總
帥兵馬既而破興州利州平其諸寨虜生口萬餘得錦州舊將杜
節並黑軍五百人天祥並統焉十一年觀太祖於魚兒灤賜金符
授提控元帥明年破益州獲完顏眾家奴遷利州節度使十四年
權兵馬都元帥明年師至真定將攻城天祥諭武仙而降木華黎
以天祥爲左副都元帥引兵南屯邢西遙水山下武仙兄武貴以
萬人壁山上天祥以黑軍百人援而登破之仙驚曰公殆有羽翼
者不然何其能也十八年賜金虎符授蒙古漢軍兵馬都元帥總
十二萬戶鎮河中其歲徇西夏破賀蘭山額傷矢明年歸北京授

右副都元帥天祥性不嗜酒喜稼穡好施予而長身駢
脅勇力絕人始與天倪並將天倪氣度宏闊天祥雄猛過之而大
畧不如從木華黎戰大河以北及綏德鄜坊無役不從數裏瘡陷
陣積功多然不好殺諭降真定爲人所稱又屢諫止屠城破青龍
堡金花帽軍五千人以堅守當戮天祥力救之皆精兵也國獲其
用自賀蘭之役亡血過多目爲之昏竟不能軍太宗用兵河南使
轉漕河上舊日留矢在頰久之瘡潰鏃自口出乃授海濱和眾利
州等處總管兼領霸州御衣局人匠都達魯花赤以老憲宗時卒
子彬江東提刑按察副使槐襲霸州御衣局人匠達魯花赤

王玉趙州甯晉人也仕金爲萬戶鎮趙州木華黎南伐以其眾降
玉多力長身駢脅號長漢萬戶從攻潞州不克玉力戰流矢中左
目竟拔其城又從攻平陽諸郡署元帥府監軍以趙州四十餘寨

隸焉武仙降復叛玉駐軍東平寨仙遣人齎誘玉妻拒不受仙圍之殺其子甯壽玉聞之領數騎突其圍斬獲數百人而還仙遣人追之不敢進皆曰王將軍驍雄我輩非敵也仙乃發玉家二十七冢以洩憤玉從天澤擊仙於真定仙糧絕走雙門仙本與宋將彭義斌應義斌來援仙玉從天澤擒義斌而殺之尋追仙於抱犢寨圍之會大風仙獨脫走斬其將四十三人真定乃平權真定萬戶假慶源軍節度副使有民負胡賈銀倍其母不能償玉代償以五千金又出家奴二百餘口爲民中統時卒子忱字允中少宿衛明孝太子宮授山東遼東道按察副使改使河北河南治憲吏詐增制語者誅之數鋤豪強禁賣奴恤戍軍冤獄多所平反累官河東山西肅政廉訪使江陵汴梁總管終雲南參知政事

耶順保定行唐人也金末與弟常聚鄉人築寨以備盜太祖九年

以眾歸國授行唐令時民皆穴地以居盜發地而噉其人順禽盜數百人殺之乃改曲陽爲恆州遷順爲恆州安撫使金將武仙攻恆大敗之賜金虎符遷恆州都元帥仙數進兵順及弟常亦數敗其眾并禽其黨郝道章仙退保真定又從木華黎敗武仙別軍於王柳口以功賜順名察納合兒常名金納合兒順充山前都元帥太宗立知中山府遷行萬戶從大軍破歸德留戍焉憲宗時卒子浹授金州招討副使佩金虎符累官歸德萬戶賜銀印大德時卒贈輔國上將軍高陽郡公謚襄敏子孫皆嗣其官順族弟曰琮武仙降復叛琮敗之於黃臺太宗時從塔察兒滅金選充真定萬戶總管府推官尋賜金符授管軍總押鎮徐州卒子澤襲累遷潁州萬戶子孫皆嗣其官

董俊字用章真定橐城人也始爲農稍涉書史善騎射金貞祐初

諸路募民爲兵橐城令立的試焉中者爲將眾莫能弓俊數破的
遂使典兵尋木華黎南下俊以寡不能戰遂降是時威州人武仙
聚眾保西山無何金主南遷石海遂據真定與仙相攻俊與二寇
鄰常夙夜治軍以防侵襲太祖十一年石海爲仙所破遂入真定
居之定武諸城皆應仙其歲史天倪攻真定不下仙益自雄大盛
氣來攻俊戰士不滿千人拒守期年仙無所利乃縱兵蹂其禾稼
俊呼語之曰汝欲得民而奪之食無道賊不爲也仙慙而去頃之
俊出其不意夜襲仙敗之定武諸城復去仙附俊會王善以中山
降十四年遂以勞擢俊知中山府佩金虎符明年金封仙爲恆山
公知真定府經畧使俊方屯兵曲陽而中山治中李全懾仙強以
城叛爲仙守仙益發兵擊俊俊復破走之俄而木華黎大軍至仙
降木華黎承制授俊龍虎衛上將軍行元帥府事仍駐橐城俊策

之曰武仙終不爲我用也木華黎以爲然遂升橐城爲永安州號
其軍曰匡國軍而遷俊左副元帥以備仙二十年仙果殺都元帥
史天倪據真定以叛中山諸郡縣復反附仙俊孤軍迄未能進討
不數月史天澤及肖乃台皆走永安俊因以銳卒授天澤復夜入真
定仙遁真定遂平得俊之援也俊在鎮十餘年爲政寬明常親課
農桑見人善治田廬必召與歡語惰者則怒罰之民以完實太宗
四年圍汴俊以軍從明年金主奔歸德追圍之金兵夜出薄諸軍
司上柱國趙國公俊忠實嘗於行在諸將各增戶口獻籍以要
譽吏請從眾俊曰民實少而詭言多他日何以應上需求乎吾不
能開厲民之路也臨敵降者不俘其子女眾義之遂皆不取治亂

黨戮其渠魁而已其內行尤懿早喪父事母以孝聞親族故人皆以恩意始終誠諸子嘗日射百日事耳詩書非積學不通也子文炳文蔚文用文直文忠文直爲橐城長官佩金符以兄弟俱遠宦留治家有篤摯之行以壽終文炳文用文忠皆別有傳

文蔚字彥華事母至孝讀書忘倦而多膂力善騎射太宗十二年詔八萬戶伐宋文炳命文蔚率十有七人私整鞍馬衣甲從眾渡淮憲宗四年文炳請於世祖以已所佩金符解讓文蔚世祖嘉之授行軍千戶使鎮鄧州是時襄陽得復失邊備弗具文蔚城光化棗陽以儲饑糧將進圖襄陽而以樊城當其衝宜亟取之宋人以爲樊城南據漢江北阻湖水卒不可渡也亦弗及備文蔚視湖淺狹處伐木並根立於水實以薪草爲橋一夕而成比曉師悉渡圍已合宋人大驚文蔚復統拔都軍以當前行奪樊城外城襄陽守將高達援師至乃還由是文蔚以勇智名九年憲宗師入蜀以蜀多天險乃命文蔚將鄧之選兵赴之從攻釣魚山文蔚冒飛石直抵其堞士多傷弗能克然帝親見之嘉其敢也賞賚殊厚中統二年召爲武衛軍千戶與平李璮至元五年卒泰定中贈明威將軍僉右衛使司事上騎都尉隴西郡伯無子弟文用子士亨嗣官侍衛親軍都指揮副使

王善字子善亦橐城人也父增監本縣酒務以孝稱善亦善養母而資儀雄偉精騎射金末以能帥眾禦盜擢橐城主簿數歲權中山府治中武仙方鎮真定有憾於善密令知府李濟府判郭安除之太祖十四年濟安張宴伏兵召善計事善覺卽率帳下士數十攻殺濟安以城來降於是以董俊知府授善金符同知府事十五年中山旣陷遷善招討使同俊屯橐城匡國軍建助俊行帥府事

武仙降復叛俊會兵攻真定善有勞焉賜金虎符太宗四年從征河南至鄭州州將馬伯堅素知善登陴呼善名而降之善治軍嚴整所過無犯鄭州民多乞從善北渡善皆授之土田以安集之數歲命兼河北西路兵馬副都總管知中山府屬邑疲於徭役善輒出私財給之又放家僮五百人爲民同邑趙迪亦孝於親金末爲橐城丞同董俊來降久之命同知匡國軍節度使事與善同以嚴名驍果不如善也善以昭慈皇后稱制之二年卒皇慶時贈銀青光祿大夫司徒冀國公諡武靖子慶淵爲行軍千戶征淮南死弟慶端字正甫初爲中山府筦庫積功爲千戶戍清口宋人來攻守將戰死城將陷慶端拔刀誓眾裏瘡力戰城賴以全進管軍總管從世祖北征累遷侍衛軍都指揮使建威武營以處衛兵經畫田廬使各守業別立神鋒軍親教以蹶張弩技作整暇堂犀利局浚

渠構室如治家事又從帝征乃顏慶端年六十餘與士卒同甘苦有名將風慶端常爲詹事丞事明孝太子於東宮成宗立拜金吾衛上將軍中書左丞行徽政使兼隆福宮左都威衛使大德二年加榮祿大夫平章政事僉書樞密院事卒官

石天應字瑞之興中永德人也善騎射豪爽不羈鄉里人皆信從之太祖十年木華黎旣下北京乃遣高德玉劉蒲速窩兒招諭興中是時金以兀里卜同知中興府不受招殺蒲速窩兒德玉走免未幾吏民殺兀里卜推天應爲帥遂舉城降木華黎卽承制授興中府尹兵馬都提控俾從南征天應善造攻戰之具臨機應變捷出如神以功拜龍虎衛上將軍元帥右監軍木華黎馳騁山東河北河東數百戰天應常以身先士卒累遷右副元帥十六年木華黎假道西夏以伐關陝自東勝濟河南攻葭州拔之天應進說曰

西戎雖降非本願也此州當金夏之衝居人健勇倉庫豐實加以長河爲限脫有所梗緩急非宜宜命將守之多造舟楫以備不虞此制敵良策也木華黎因表授天應金紫光祿大夫陝西河東行臺兵馬都元帥留勁兵五千使守葭州天應遂下令造舟楫建浮橋然諸將多言水漲波惡恐勞費無功天應任之堅明年橋成諸將始大悅服先是葭守王公佐見大軍至而遁頃收合餘燼意在乘隙規復故地亦見橋成潰去俄而木華黎克河中金河中治中侯小叔奔樂李寨天應因謁木華黎於汾水東木華黎與言河中要害守難其人意在天應天應還召將佐謂曰吾累卿等留屯於此然未若河中東西皆平川廣野可以駐軍規取關陝也國王又欲屬我我當南行或諫曰河中本用武地然南有潼關西有京兆金重兵屯焉我軍府新立民初附其心未一恐不無噬臍之悔天

應曰葭州止通鄜延今鄜已平延乃孤立若發國書令夏人取之易耳夫國家之急本在河南河中雖迫於二鎮而北接汾晉西連同華地千餘里戶數十萬若起漕運以通餉餽則關中可尅期而定關中定則河南已鹽其脣矣吾年垂六十老耄將至一旦卧牀第聞後生立功名吾死不瞑目矣遂請移鎮仍行臺都元帥而令平陽太原吉隆等將帥悉聽節制天應復作浮橋以通河西旣而侯小叔果夜襲河中天應知之先遣驍將吳澤伏兵邀之澤勇而嗜酒方醉卧而金兵直抵城下時兵燼後守具未完新附者爭繩而去敵乘隙入遂舉火天應親搏戰左右四十餘騎皆曰吳澤誤人因勸西渡河天應曰我違諫南遷今事急棄去是不武也且吾何以見國王乎遂奮前死之是時天應弟天禹子佐中在河中敵不之識也伺敵少懈倒抽其斧反斫之突城而出趨木華黎行

營求得蒙古軍數千還與敵戰敗之木華黎嘉其勇奏授金符行元帥尋授興中千戶天應子煥中襲領父眾仍知興中府執中行軍千戶受中興中府相副官而佐中子安琬襲千戶佩金符從征大理討李璮皆有功又討平分甯之亂累功進懷遠大將軍賜金虎符大同萬戶屯田紅城同官李萬戶當戍和甯親老且病安琬請代其行人重其義戍還以疾卒子居謙襲職終忠翊侍衛親軍都指揮使

論曰天倪欲推心置腹示人以廣大天應銳意功名有著鞭恐先之意而皆以違諫死天應爲勝矣何則天應本視死如歸雖周防爲稍疏不若天倪之入陷阱而不悟也然俊智且慎終及滅頂故死生天耳君子赤心爲國家而已世多訾議費禱而來歟又豈不膏人之匕首哉

唐仲雄 刊

王震球

門人曾鏗襄校

門人曾士琮詳校

元書卷三十五

元書卷三十六

邵陽曾廉譏

吾也而移刺涅兒石抹也先禦直臘魯華王珣何實李守賢列傳
第十一

吾也而一曰烏野兒珊竹氏散只兒部族也先世見始祖諸族傳
吾也而狀貌甚偉腰大十圍太祖六年從哲別那顏克金東京十
年從木華黎萬戶攻北京領兵爲先驅下之木華黎以降將烏古
論寅答虎仍留守北京而以吾也而權兵馬都元帥鎮之尋授金
紫光祿大夫北京總管都元帥綏懷有方降者相繼時金將撻魯
以惠州漁河口爲隘有眾數萬圖復北疆而趙守玉亦據興州吾
也而卽會史天祥往討守玉平之撻魯又寇龍山復會天祥進擊
斬撻魯於軍殺戮數千人獲其旗鼓羊馬無算十二年從木華黎

討張致於錦州吾也而先攻溜石山以致致師遂破致木華黎大喜酬以馬十匹甲五事興州監軍重兒又叛會移刺涅兒往征之賊軍射殺所乘馬軍士憤怒衝戈奮擊遂大破之十五年從木華黎國王征山東大戰東平弗克生挾二將以還明年復從攻延安矢中右股延安不下進攻鄜州同史天安與金驍將張資祿戰禽以獻二十一年從太祖征河西明年平之賜馬五匹甲一事太宗元年入覲命與撒禮塔征遼東勝之三年復與撒禮塔征高麗下受開龍宣泰葭等城高麗請降而還既而復反吾也而再帥師進征十三年高麗王瞰遣其族子綽從吾也而來朝帝大悅命充北京東京廣甯開元蓋平泰七路征行兵馬都元帥佩虎符憲宗元年召問東夷事對曰臣雖老倘藉威靈指揮三軍敵國猶可克況東夷小醜乎帝壯其言問今飲酒能幾何對曰惟所賜時有駙馬

素名善飲命與之角帝觀其嗜酒狀大笑賜錦衣名馬俄謝病歸七年復來朝帝閔其老謂曰自太祖時效勞至今者獨卿無恙賜賚甚厚以都元帥授其中子阿海八年秋夜星隕庭前光數丈有聲吾也而曰吾死矣明日卒年九十六贈營國公謚忠勇士四人雪禮最有名亦曰撒禮太宗時授北京達魯花赤至元七年改河間總管雪禮子拔忽都仕同知北京轉運司事累遷刑部尙書終江東宣慰使

移刺涅兒故遼族也本耶律氏異文或曰金人改耶律爲曳刺曳刺馬前卒之稱非也涅兒膂力過人多謀畧金數授以官皆辭不受涅兒自以爲遼人遼亡雖日久猶不忘金之爲讐也太祖六年伐金涅兒則私喜帥其黨百餘人詣軍門獻十策太祖召與語奇之賜名賽因必闔赤又問生何地對曰霸州因號爲霸州元帥霸

州者遼之舊霸州更名興中府者也帝尋使從木華黎出征取金北京下高利興松義錦等州二十六城五十四寨十一年復與王珣吾也而破錦州獲張致以功授龍虎衛上將軍兵馬都提控元帥進渡遼攻金復蓋州得佩金虎符後從攻延安金完顏合達堅守不下涅兒鼓勇先登手殺數十人金人亦力戰矢中其左臂創甚乃還復裹瘡進戰木華黎止之曰身未至死敢自愛耶木華黎益壯之與所乘白馬明日介馬飾以朱纓簡驍衛七十人與俱遂馳突萬眾中木華黎升高適見之曰霸州元帥也遷軍民都達魯花赤都提控元帥兼興中府尹復從攻鳳翔還二十一年從帝征河西二十二年從嗣國王李魯攻下益都明年得病歸高州卒贈推忠宣力保德功臣太尉開府儀同三司上柱國興國公謚武毅子買奴

買奴蚤從父習戰陣初入見太宗奇其對曰此兒甚肖乃父使爲高州等處達魯花赤兼征行萬戶太宗三年命從撒禮塔征高麗買奴別將攻花涼城監軍張翼劉拔都殞於敵買奴怒曰兩將陷賊義不獨生趣出戰破之誅其渠撫其民進攻開州禽州將金沙密城中人出童男女及金玉器以獻卻不受進下龍宣雲泰十四城五年從按只吉歹大王征蒲鮮萬奴有功未幾召還興州趙祚挾土豪等楊買驢以反命從皇兄察合台討之斬賊將董蠻等進圍買驢於險樹寨三月不能下買奴乃令健卒卽寨北小徑上大樹以繩潛引百人登寨直前刲之買驢投崖死其黨悉平賜金鞍良馬七年復從唐古征高麗拔其數城賜金鎖甲進征東大元帥佩金符復命出征高麗將行以疾卒贈推誠效義功臣榮祿大夫平章政事興國公謚顯懿子元臣別名合刺合孫年十六入宿衛

爲怯辭必閹赤襲千戶將其父軍從伐宋攻淮西數有功復從丞相伯顏平宋進中衛親軍總管佩金虎符只兒瓦台叛是時魯國公主在應昌府只兒瓦台圍之合答兒等軍皆來援元臣所部戰最力只兒瓦台敗走追至魚兒灘又敗之只兒瓦台走禿兀刺河公主賜賚甚厚奏請留元臣鎮應昌以安反側遷後衛親軍副指揮使居三歲召還阿合馬敗帝以籍其家婦人賜之元臣辭曰臣家世清素不敢自汚帝嘉歎不已進同僉江淮行樞密院事行院罷歸高州帝親征乃顏元臣帥家僮五十人見於行在願效前驅移僉湖廣行院時溪洞施溶等州蠻獠作亂元臣喻以禍福其酋魯萬丑降居二歲卒官贈安遠功臣龍虎衛上將軍同知樞密院事興國公諡忠靖子迪官湖廣宣慰使都元帥

石抹也先一曰阿辛故遼后族也祖庫烈兒誓不食金祿率部落

遠徙也先勇畧過人善騎射豪服諸部木華黎軍至北京也先帥北京等路民萬一千戶降及下北京木華黎將屠之也先力諫語在太祖本紀木華黎因以上聞乃赦之授也先御史大夫領北京達魯花赤興中石天應之降因也先也尋副阿朮魯闔里必監張鯨軍征燕南未下州郡至平州鯨稱疾不進也先執鯨送行在所帝責之曰朕何負汝而反對曰臣實非反也帝曰今呼汝弟致爲質當活汝鯨諾而宵遁也先追斬之致已殺使者應其兄矣致既伏誅也先籍其私養死士萬二千人號黑軍者上於朝賜金虎符加鎮國上將軍以御史大夫提控諸路元帥府事遼西灤東悉付之後從木華黎攻蠡州先登中石死焉子四人查刺知名亦善射襲御史大夫仍領黑軍授萬戶太祖命分屯真定固安太原陘吉岢嵐閒太宗立命三萬戶分守中原查刺與史天澤劉黑馬各專

方面而統於也可太傅耶律禿花或曰三萬戶有粘合重山無查刺查刺別一萬戶也頃之國兵圍南京查刺帥黑軍自河北馳赴與金師遇於河查刺大呼陷其陣渡河再戰再敗之遂會師於汴尋從國王塔思征蒲鮮萬奴於東京東京城堅如立鐵久攻不下查刺命將先警其東北親奮長槊大呼登其西南摧其飛檣手刃陴卒數十人眾軍乘之遂克之塔思解錦衣以賜累遷真定北京兩路達魯花赤卒於故柳城子庫祿滿襲職從征李璮中流矢卒子良輔襲黑軍總管以功累遷沿海副都元帥改上副萬戶請老子繼祖襲萬戶也先兄瞻德納始仕金歸國爲別失八里達魯花赤其孫亦刺馬丹仕至遼陽左丞亦刺馬丹子倉赤官終湖廣平章政事

梁直臘魯華怯烈部族也初從太祖征乃蠻西夏有功以命從木

華黎爲前鋒下金桓州軍勢大振太祖六年遼西諸州多平而東京未下命從哲別那顏往取之師薄東京不克會金遣使往東京邀獲之梁直臘魯華曰東京金舊都備嚴而守固攻之不易下也今請易服與其使偕往說之彼將不疑俟其門開繼以大軍赴之則可克矣哲別因陽解兵縱其使者入而以銳卒潛躡其後遂克東京後徇地河北攻大名中流矢卒子撒吉思卜華代將其軍太宗元年錫金符安輯河北山東諸州俄命以總帥行省監真定五路萬戶史天澤軍太宗之自白坡濟河也撒吉思卜華亦渡自河陰至鄭鄭守馬伯堅降已而金主自黃龍岡濟河謀復衛州撒吉思卜華蹕之與其丞相白撒戰白公廟五日夜俘斬萬計金主竄歸德撒吉思卜華復從之而南薄其北門而軍然左右皆水金舟師日至其將官奴乘夜斫營腹背受敵撒吉思卜華軍遂沒國王

塔思承制以其弟明安荅兒領其行營詔以爲蒙古漢軍萬戶明安荅兒善騎射從征淮安因糧於敵未嘗困乏士樂爲用憲宗三年遣從昔烈門太子南伐卒於鈞州子曰腯虎曰普蘭溪腯虎從世祖北征戰甚力賜號拔都魯並賞白金平李璮亦有功普蘭溪終光祿大夫徽政使方金亡命大臣忽都忽料民分封功臣撒吉思卜華妻楊氏自陳曰吾舅及夫皆死國事何獨見遺事聞帝曰彼家再世死難宜賜民二百戶武宗時贈梁直腯魯華太傅謚武敏撒吉思卜華太師謚忠武明安荅兒太保謚武毅爵皆衛國公王珣字君寶本耶律氏金正隆末契丹窩斡叛其祖避難遼西更姓王氏遂爲義州開義人珣武力絕人能擊鞠善騎射金季盜起諸驍桀多擁眾據地珣亦招集鄉民至十餘萬保義州太祖十年木華黎克北京徇義州珣帥吏民出迎因承制以爲元帥兼領義

川二州事明年張致簪號錦州結開義楊伯傑等來掠義州珣軍出城而伯傑走值致兄子以千騎來援珣選十八騎突之復令張左右翼以進其眾驚潰獲其馬幾盡是時興中亦叛木華黎檄召珣會攻致甚憚珣窺珣已出因乘虛夜襲之家人皆遇害既而興中平珣無所歸木華黎留珣於興中遣其子榮祖馳奏其事太祖曰汝父子宣力邂逅此難歸語汝父善撫其軍俟致平彼之族屬城邑人民當一以付汝仍免徭賦五年也珣以木華黎兵復開義禽伯傑等殺之十二年復從攻錦州獲致及其黨千餘人珣誅致家而釋其餘事具張鯨傳珣旣破致始還義州尋入朝帝嘉其功賜金虎符加金紫光祿大夫兵馬都元帥鎮遼東便宜行事兼義川等州節度使珣貌黑人呼爲哈刺元帥國人言黑曰哈刺也復從木華黎兵畧山東至滿城令還鎮戒之曰彼新附之民恃山海

之險反覆不常非盡坑之終必爲變對曰國家經畧中夏宜以恩信結人若降而殺之後豈復有至者乎遂還以子榮祖代領兵南征居十歲卒珣爲政簡易賞罰明信誅強撫弱毫髮無徇初珣年三十餘遇道士相珣曰奇奇君他日待青馬而貴歲餘果有鬻青馬者喜買之遂起事又行凌水濱得古刀銘曰舉無不克動必成功佩之有警刀必先鳴云

榮祖字敬先語音如鐘勇力絕人珣降榮祖爲質子於木華黎軍中稍見任用珣卒襲爲榮祿大夫崇義軍節度使義州管內觀察使從嗣國王李魯入朝以勇留入宿衛俄命還集兵副撒禮塔征遼東是時金遼東行省葛不靄守婆速而蓋州復爲所陷榮祖復克蓋州進拔十餘城葛不靄死復破其餘眾於石城降其二將放還生口千餘撒禮塔欲散之麾下爲俘榮祖屢請皆放爲民太宗

遷榮祖北京等路征行萬戶三年復從撒禮塔征高麗圍其王京高麗請降乃還五年從按只吉台大王討平東夏還而趙祚以興州叛復從討斬之後數征高麗始從唐古擊破其十餘城高麗王瞰遣其子綽入侍帝賜之錦衣憲宗時復從也苦大王擊降其天龍諸堡俄復下甕子城竹林寨苦苦數島帝嘉其功賜以金幣官其子興千戶移鎮高麗西京榮祖乃募民屯戍闢地千里盡得諸島嶼城壘於是王瞰乃遣其世子僕出降遂以僕入朝自是高麗乃服中統元年世祖召見撫慰進沿邊招討使仍兼北京等路征行萬戶賜寶鞍弓矢還鎮以疾卒子十三人顯者七人通興中府尹泰權知義錦川等州總管興征東千戶遇襄陽路管軍萬戶達東京五路征行萬戶廷中衛親軍都指揮使璵江西湖東道提刑按察使

何實字誠卿其先北京人也祖鼎敬父道忠仕金俱爲北京留守實少孤依叔父居家人嘗入卧內見一青蛇蜿蜒衣被中駭視之乃實也及長通諸國譯語驍勇善騎射以雄俠爲鄉人所信張致之圖叛也適實至謀於實實厲聲叱責之卽籍戶口一萬募兵三千以太祖十一年來歸木華黎與論兵奇之遂引見太祖獻軍民之數帝大悅賜之鞘劍命屬木華黎爲前鋒實遂從討致戰於神水縣斬致兄子東平實與有功授帳前軍馬都彈壓木華黎東下齊數郡使實將兵四千取燕南齊西之地首擊邢州徇趙郡取魏鄴下博關襲曹濮恩德泰安濟甯所向輒破薄濰州與木華黎會遷兵馬都鎮撫復從取雁門石陘等州悉平之又引兵掠太原平陽河中京兆均有鹵獲木華黎妻爲元帥左監軍木華黎薨嗣國王李魯令實戍邢邢自武仙兄貴亂後人曰蕭條實多著善政爲

邢人所敬實在軍間凡俘工匠七百餘人因分織匠五百戶置局課織二十二年賜金虎符便宜行元帥府事實以邢州歲屢飢請移匠局於博李魯從之閔其勞悴使勿出征博值兵火後物貨不通實以絲數印置會子權行一方民獲貿遷之利太宗二年詔盡收諸將金符後復以實子仲澤質軍中九年太宗召入朝實貢金幣文綺三篚次陵州遇盜實命左右射之斃二十餘人生獲十餘人旣見於幄殿帝命以獲盜賜實因賜坐與論軍中故事欲授以征行元帥實以左臂不舉並辭監軍而乞元佩金符俾督治工匠帝默然不悅命入宿衛密使人覩之誠然始可其奏乃賜宴取金符親賜之授以漢字宣命充御用局人匠達魯花赤子孫世其職憲宗時卒於博子崇禮仕同知制誥兼國史院編修官

李守賢字才叔北京義州人也祖小字放軍仕金嘗從攻宋淮南

主將命列校殺所俘有亡失者死放軍當殺五百人皆縱之去太祖卽位六七年間守賢暨兄廷植弟守正守忠從兄惟則伯通伯溫皆歸歟於木華黎伯溫及伯通守正守忠俱在忠義傳太祖始授廷植龍虎衛上將軍右副元帥崇義軍節度使守賢臨海軍節度觀察使二十二年守忠殉難於是守賢乃自錦州遷河東南路都總管加金紫光祿大夫知平陽府事太宗二年南伐金道平陽見田野不治以問守賢對曰民貧窘乏耕具致然詔給牛萬頭仍徙關中生口墾地河東明年平陽當輸雲中粟萬擔守賢奏以百姓疲敝不任輓載時河中未下守賢以爲將士自此渡河遮留多傷溺請自北面鑿城先登城果下遂構浮橋南濟潼關復大破趙雄兵於芮城詔會師圍汴尋命留屯嵩汝金兵十餘萬保少室太平寨守賢以三千人介其中度其帥完顏延壽無守禦才乃以五

年正月元夕乘其方擊球爲樂遣輕捷者數十人緣崖巖附以登大破之收其餘眾以歸俄而連天交牙蘭若香爐諸寨俱下守賢未嘗妄戮一人進攻中京其留守強伸帥死士突出追斬之已而秦藍帥王祐以眾數萬降關東洛西遂定明年卒子彀嗣太宗命從太師都元帥達海紹卜征宋川峽連戰有功授河東道行軍萬戶兼總管憲宗攻合州造梁嘉陵江以通東西而絕宋人之援會江漲梁絕宋人以舟師逆上北軍戰不利彀冒險犯之宋師始退明日帝召謂諸將曰汝輩自負鷙勇今臨敵能如李彀乎因賜以金中統三年改河東路總管佩金虎符徙京兆又徙洛磁數年卒論曰吾也而諸人抑何其雄猛也譬如工師以大木爲樑棟亦必資節稅以成宮室也珣實守賢爲政亦有可稱者足以救民困矣

門人李光朝

刊

衡陽劉伯尊

門人曾毓才襄校

門人曾士琮詳校

元書卷三十六

元書卷三十七

邵陽曾廉譏

忽都忽察罕按竺邇劉敏列傳第十二

忽都忽一日忽都華曰忽都虎曰胡土虎曰忽魯虎曰失乞刊忽都忽曰失乞忽都忽曰失吉忽禿忽亦曰忽都亦稱忽都虎那顏不知其氏族太祖破塔塔兒所得營中小兒也太祖攜以奉宣懿太后遂養以爲子宣懿太后凡養小兒四人曰古出曰闊闊出曰博爾忽曰忽都忽博爾忽自有傳太祖皆弟之而忽都忽謂之六弟太祖正尊號則以爲札魯花赤得專生殺凡所科斷皆書於青冊復賜之土城中百姓石抹明安旣下金中都太祖命忽都忽及汪古兒阿里海合撒兒往籍中都帑藏是時金守藏官合答雖已降猶頗以金帛相饋遺汪古兒阿里海合撒兒受之忽都忽曰昔

者中都金帛皆屬金主今皆成吉思皇帝有也可擅取耶遂却不受太祖聞而嘉之後從太祖征西域與札闌丁戰失利太祖自帥諸將破之忽都忽遂同八刺追札闌丁至欣都恩大掠欣都思而還太宗既滅金遂以忽都忽爲中州札魯花赤逾年命同曲出太子伐宋還命大料漢民別其稅則因析爲科徵科差之法爲元代定制事具食貨志忽都忽有綜覈才所驗人無隱漏劉秉忠頗言其括戶差徭甚大然大率密而不苛其治民尙簡易亦頗爲當時所頌云是時太宗以忽都忽既定民籍遂欲裂土封諸王及功臣以耶律楚材言於是定官給歲賦忽都忽以功得食廣平四千戶並命差次諸功臣食邑多寡焉是時副忽都忽籍戶口者曰野里尤高昌人父達釋勸高昌王歸國野里尤與伐金有功與忽都忽籌度功臣分地人以爲敏云

察罕亦曰察韓名益德烏密氏唐兀人也父曲也怯律仕西夏其妾方懷察罕不容於妻以配掌羊羣者察罕稍長其母以告始知之察罕武勇過人幼牧羊於野植杖於地脫帽置杖端跪拜歌舞太祖伐西夏適出獵見而問焉對曰一人行則以齒論尊獨行則帽在上而尊今獨行故致敬於帽也帝異之乃挈歸語光獻皇后以爲佳兒給事內廷長賜姓蒙古妻以宮人宏吉刺氏從帝伐金金將紇石烈九斤以重兵守野狐嶺遣覘之察罕還言彼馬足輕動不足畏也帝遂進破其兵圍白樓拔之以功爲御帳前千戶久之從太祖西征已拔薛迷思干將益南而回回札闌丁拒守鐵門關不得進察罕及郭寶玉攻關破之師自西域還又從攻西夏時曲也怯律方守甘州妻更生子矣察罕至甘乃射書城中告其父請歸國且求見其弟曲也怯律命登城於高處見之於是遂約降

而其副阿綽等三十六人合謀殺曲也怯律父子併力拒守城破帝欲盡坑之察罕言百姓無罪止罪三十六人而已旣而西夏主亦就禽眾欲屠中興察罕亦力諫乃止馳入安集遺民太宗卽位從畧河南北賜馬三百珠衣金帶鞍勒曲出太子及忽都忽伐宋命察罕爲斥候又從口溫不花南伐授馬步軍都元帥帥諸翼軍圍廬州不克張柔克壽州欲留兵守之察罕又不從進拔天長及滁泗州還定宗卽位賜黑貂裘一鑽刀十命拓江淮地憲宗立召見累賜黃金珠衣金綺命以都元帥兼領尚書省事賜河南北及諸草地合二萬餘戶爲食邑未幾復召賜黃金金綺弓矢等物五年卒贈推忠開濟翊運功臣開府儀同三司上柱國追封河南王謚武宣子十人長木花里從攻釣魚山以功授四大斡兒朵怯憐口千戶賜金幣黃金鞍勒世祖卽位賜以金珠至元四年從都元

帥阿朮伐宋自江陵畧地還至安陽灘宋兵扼其歸路阿朮墮馬宋兵幾及之木花里鏖戰退宋兵夜復設伏大敗其眾進蒙古軍萬戶佩金虎符特賜以銀復攻襄樊有功卒於軍贈推誠宣力功臣榮祿大夫平章政事柱國梁國公謚武毅從孫亦力撒合亦力撒合祖曲也怯祖察罕兄也太祖召見使爲察合台太子札魯花赤父阿波古事阿魯忽大王於于闐至元十年擇貴族子備宿衛召亦力撒合以爲速古兒赤甚見親幸有大政時以訪之稱之曰秀才而不名嘗奉使河西還奏只必帖木兒王用官太濫帝嘉之擢河東提刑按察使逐平陽路達魯花赤太不花召還賜金銀以旌其直進南臺御史中丞帝出內中寶刀賜之曰以鎮外臺時宰相阿合馬子忽辛爲江淮平章政事恃勢貪穢阿合馬死姦露命究勘之亦力撒合奏得其贓鈔八十一萬錠遂誅之並劾江

淮釋教總攝楊璉眞加姦利不法諸道竦動改北京宣慰使亦力撒合察乃顏大王有異志必反密請備之二十三年罷宣慰使立遼陽行省以亦力撒合參知政事已乃顏果反帝親征諸軍皆會亦力撒合主餉饋軍供無乏事平帝嘉其先見且勞加左丞二十七年命尙諸王算吉女親爲資裝以送之並賜玉帶徙四川

左丞元貞元年入朝卒弟立智理威

立智理威爲明孝太子必闇赤至元十八年帝以蜀初定地久受兵百姓傷殘擇近臣撫安之以立智理威爲嘉定路達魯花赤時方以闢田均賦弭盜息訟諸條課守令立智理威奉詔甚謹民安之使者交薦其能會盜起雲南號數十萬聲言欲寇成都立智理威馳入告急言辭懇切繼以涕泣大臣疑其不然帝曰雲南朕所經理未可忽也乃推食以勞之又語之曰南人生長亂離豈不厭

兵畏禍耶御之乖方保之不以其道故爲亂耳其歸以朕意告諸將叛則討之服則舍之毋多殺以傷生意則人必定矣立智理威至蜀宣布上旨俄召爲泉州府卿遷刑部尙書有小吏誣告漕臣劉獻盜倉粟宰相桑哥方事聚斂眾阿其意鍛鍊枉服立智理威曰刑部而不持平輦轂之下漕臣以冤死何以服四方乎卽以實聞以是忤桑哥出爲江東道宣慰使在官務興學諸生有俊秀者拔而用之爲政嚴明豪民猾吏縮手不敢犯然亦無所刑戮而治元貞二年遷四川參知政事大德三年改湖南宣慰使徙荆湖荆湖多弊政而公田爲甚部內實無田隨民所輸租取之戶無大小皆出租雖水旱亦不免立智理威問民所不便凡十數事上於朝而言公田尤切朝議遣使理之有詔凡官無公田者隨俸給之民力小蘇七年復參知四川政事明年進左丞雲南王入朝所在以驛

騎縱獵立智理威曰驛騎所以傳命令事非有急且不得馳况獵乎王憚爲之止蜀人饑賑以活之而掩其殣大脩寬政部內以治十年入朝賜白金對衣徙湖廣左丞湖廣歲織幣上供省臣領之而遣使買絲他郡多爲姦利工官又爲刻剝故匠戶曰貧造幣益惡立智理威乃罷使令工自視賈有藏絲者擇買之工不告病歲省費數萬貫他部皆效其法至大三年以疾卒於官贈資德大夫

陝西右丞上護軍甯夏郡公諡忠惠加贈推誠亮節崇德贊治功臣榮祿大夫平章政事柱國秦國公子二人曰買訥翰林學士承

旨曰韓嘉納買訥子曰荅里麻內八府宰相

韓嘉納累官平章政事至正七年出爲西臺御史大夫未行復留平章政事九年改御史大夫初帝幸臣合麻及其弟雪雪皆有寵並趨附宰相脫脫之門已而脫脫去位別兒怯不花爲丞相每讒

害脫脫合麻輒左右之及別兒怯不花罷韓嘉納長臺監察御史幹勒海壽對仗劾合麻設帳房於御幄後無人臣禮又言以提調甯徽寺爲名出入脫忽思皇后宮闈言甚切至合麻諷知之乃先訴於帝言韓嘉納向與前右丞相別兒怯不花及今左丞相太平右丞禿滿帶兒十人約爲兄弟謀持朝政今別兒怯不花以罪被謫太平等疑爲臣構每欲陷害臣以洩其憤臣實畏之已而韓嘉納果以御史章上帝於是乃大怒斥其疏弗納明日章再上帝不得已爲奪合麻雪雪官居之草地亦出幹勒海壽爲陝西廉訪副使罷太平爲翰林學士承旨韓嘉納爲宣政使未幾脫脫復相遂出韓嘉納爲江浙平章政事既而合麻復構之脫忽思皇后后遂泣訴於帝謂御史劾合麻爲侵已也帝益怒乃除海壽名屏歸田里禁錮之並加韓嘉納以贓罪杖流奴兒干已而出禿滿帶兒爲

四川右丞亦誣以罪中道追殺之韓嘉納遂死貶所幹勒海壽字先常河南人也

按竺邇雍古氏雍古者汪古也本居雲中塞上父黜公爲金羣牧使哲別攻中都驅所牧馬去黜公死按竺邇幼鞠於外祖朮要甲家訛言爲趙家因姓趙氏年十四隸察合台太子部下嘗從獵射得數麋忽一虎突出射之皆死由是知名從太祖西征克阿力麻里以功爲千戶又從攻積石州先登拔其城又攻西夏諸城皆有斬獲太宗立尊察合台爲皇兄以按竺邇爲元帥鎮刪丹州自敦煌置驛抵玉門通西域便往還焉已而從圍鳳翔斬金將劉興哥命別將攻西和州宋將彊俊眾數萬固守不出按竺邇率死士罵城下俊怒出按竺邇陽走俊追之因以奇兵奪其城遂禽俊餘眾退保同慶進攻破之師北還平涼慶陽邠原涇甯皆降涇州復叛

殺守將郭元恕眾議屠之按竺邇曰不然彼懼吾驅之北徙耳乃遣人諭之曰汝輩若走則按軍法父母妻子並戮矣若歸則保無他明年草青具牛酒迎師於此於是州民皆歸復業拖雷太子由山南下唐鄧按竺邇實爲先鋒金亡獨洮河蘭會元帥郭蝦蠍力保金蘭定會四州乃命按竺邇往取之遂圍會州蝦蠍盡室自焚按竺邇爲救其孤而定其地時闔端太子南伐嘉其材勇賜名拔都兒奏拜征行都元帥按竺邇復從穆直王出西河破宕昌寨略階州攻文州守將劉銳堅壁數月按竺邇謀知城中無井奪其汲道遂拔其城因招徠土蕃酋長勘陁孟迦等十族皆賜以銀符略定龍州遂與闔端大軍會克成都然不克守成都而還按竺邇言於穆直曰隴西州郡方平人心猶貳成州當隴蜀之衝宋及土蕃利於出寇此宜得良將鎮之也穆直曰安反側制寇賊上策也然

無以易汝遂分蒙古千戶五人隸之以往按竺邇命侯和尚南戍
沔州之石門朮魯西戍階州之兩水謹斥堠嚴巡邏西南諸州不
敢犯尋從太師都元帥達海紺卜克隆慶進攻重慶圍萬州宋人
將舟師溯流迎戰按竺邇以勁兵乘巨筏浮草於其間弓弩雨射
宋人不能敵敗諸夔門復同土薛汪世顯等取成都事在世顯傳
既又命按竺邇安輯涇汾二州而宋制置余玠攻興元文州降將
王德新乘隙自階州畔執一鎮將領兵千餘走江油朝廷復遣按
竺邇還舊鎮按竺邇遂遣將擣江油奪二鎮將歸久之請老已委
軍於其子世祖卽位阿藍答兒渾都海圖據關隴應阿里不哥按
竺邇曰內難方殷豈臣子安卧時耶遂引兵出刪丹耀碑谷從合
丹諸王合戰功上降璽書褒美並賜弓矢錦衣四年卒延祐元年
贈推忠佐運功臣太保儀同三司上柱國秦國公謚武宣子十人

徹里襲紐璘攻雲頂山徹里自水門先登破其壁雲頂遂拔攻重
慶徹里爲先鋒敗宋兵於馬腦山世祖卽位爲征行元帥至元二
年以病罷子步魯合荅代領其軍授管軍千戶宋將皆萬壽攻成
都步魯合荅以七百人禦之於沙坎敗之從圍嘉定嘉定降進攻
重慶宋兵突圍出走銅羅峽步魯合荅追至廣羊壩斬首二百級
瀘州叛還軍討之步魯合荅以兵攻寶子寨歲餘破之復以下重
慶功遷征行元帥數歲命統蒙古探馬赤軍千人從征金齒蠻都
元帥忙兀台征羅必甸步魯合荅先行爲游兵江水暴溢帥眾泗
水而渡去城三百步而營居七日諸軍會城下乃進攻之步魯合
荅先登拔其城遂屠之又從征八百媳婦至車里其酋所居也諸
王闢闢命步魯合荅將游騎三百往招之降不聽進攻之都鎮撫
侯鎮死焉步魯合荅毀其北門遂入其寨其地悉平賜金虎符遷

雲南萬戶府達魯花赤卒子忙古不花襲管軍千戶徹里弟國寶國寶一名黑梓又曰黑子倜儻有畧父爲元帥軍務悉以委之從攻重慶并掠合州以歸中統元年從平阿藍答兒於甘州而其將火都猶據土蕃點西嶺國寶攝帥事同鞏昌便宜都總帥汪惟正討之與惟正計緩師以待其弊遂殺火都事在惟正傳國寶以功賜弓矢金綺初按竺邇招徠勘陁孟迦叛服不常而徹里病不任事國寶乃慨然曰昔我先人耀兵西陲關隴雖平西戎未靖此男兒立功之秋也乃遣謝鼎與弟國能往說勘陁孟迦遂從國寶入覲國寶因奏文州山川險阨宜城以屯兵從之授蒙古漢軍元帥兼文州土蕃萬戶府達魯花赤與勘陁孟迦皆賜金符國寶宣上威德並招舊扶州諸羌阿哩禪波哩揭諸酋皆納款入朝復圖其山川形勢以獻詔授阿哩禪波哩揭爲萬戶賜金虎符諸酋皆爲

千戶賜金符賜國寶金幣國寶治文州有善政至元四年卒延祐元年贈推誠佐理功臣光祿大夫平章政事柱國梁國公諡忠定子世榮世延初國寶將卒世榮幼請以弟國安襲其職後論國寶安邊功賜金虎符與討叛王禿魯於六盤卽請解職授世榮帝曰人爭而汝讓可以敦薄俗矣錄六盤功授招討使於是世榮襲蒙古漢軍元帥文州土蕃萬戶府達魯花赤後以功進土蕃宣慰使議事都元帥佩三珠虎符世延別有傳

劉敏字有功宣德人也太祖七年敏年十二父母攜以避兵德興禪房山已而兵復至父母棄敏走大將憐而收養之會太祖設宴於行營敏隨大將入帝見其貌異之俾留宿衛習國語閱二歲能通諸部語帝益嘉之賜名玉出干出入禁闈初爲奉御太祖征乃蠻遺孽屈出律於谷則幹兒朵又征回回薛迷思干敏皆從行太

祖在西域未班師命敏先還授燕京安撫使賜玉印佩金虎符便宣行事給以西域工匠千餘戶及山東西兵士立兩軍戍燕置二總管府以敏二從子爲之佩金符敏奏佐吏宋元爲安撫副使高逢辰爲僉事李臻爲參謀初石抹明安平燕其子咸得不襲爲行省而其親屬及勢家子往往挾弓矢爲盜民甚苦之敏以聞而耶律楚材及塔察兒來窮治其事燕民乃安事在楚材傳敏又察豪民多挾良爲奴乃悉歸之選民習星占者爲司天太史氏興學校延名士爲師太宗卽位內造行宮幄殿外立驛傳又城和林建萬安宮設宮闈司局旣成宴賜甚渥十三年授行省詔敏所行有司不得與聞俄而牙老瓦赤歸自西域與敏同治漢民牙老瓦赤素倨尙氣耻不得自專俾其屬忙哥兒誣敏以流言敏出手詔示之乃已帝聞爲罷牙老瓦赤而專任敏復辟李臻爲左右司郎中臻

在幕府二十年多所裨益敏能任人也憲宗時請老以子世亨代乃賜世亨銀章仍佩金虎符賜名塔塔兒台並諭世亨不從命者黜之又賜其子世濟名散祝台爲必闔赤入宿衛帝伐宋敏輿疾請見於陝西帝曰卿有疾不召而來將有言乎對曰臣聞天子出巡義當扈從敢辭疾乎但中原土曠民貧勞師遠伐恐非計也帝弗納敏還居年豐世祖以皇弟南伐過焉敏入見謂之曰我太祖勵精圖治見而知之者惟卿耳卿其彙次以爲後法未幾病歸於燕卒初敏久制燕少戢咸得不之暴及牙老瓦赤來非其願也旣而憲宗立召敏赴行在時牙老瓦赤方以請易印於帝前爲趙璧所奪語在璧傳然憲宗卒用牙老瓦赤命與布智兒幹魯不覩荅兒共充燕京尚書行省皆粗野無法世祖在藩嘗過燕見其一日殺二十八人其一人盜馬者旣杖釋之旋以試環刀追還斬焉世

祖曰凡死罪必詳讞而後行刑今一日而殺二十八人能無非辜乎且旣杖復斬此何刑也布智兒錯愕不能對敏亦以其大橫贖故請以子代布智兒者亦曰不只兒脫脫里氏父曰紐兒傑賜名八都魯布智兒從征回回等國嘗奮身陷陣中矢而仆太祖命割牛腹溫之始蘇憲宗名之曰大都行天下諸路也可札魯花赤印造寶鈔賜七寶金帶質孫十襲又賜蔚州安定爲食邑卒諸子皆爲達官牙老瓦赤亦曰牙刺瓦赤曰牙魯瓦赤曰野老瓦實曰牙刺注赤回回人姓忽魯木石氏子阿里別亦曰阿里伯歷中書執政出行省河南主襄樊軍餉未嘗有乏其後平章江淮政事爲阿合馬所譖殺之事具阿合馬傳後謚忠節

論曰昔顧雍拔丁謂於孤家揚吾粲於牧豎豈若太祖親提攜孤童子爲名將相乎元家初征斂無章忽都忽爲定民賦其利溥矣察罕按竺邇皆摧敵立功劉敏尤以治績著聞武昭文鑠語云醴泉無源豈不信哉蓋觀於此而後知太祖之所以克成大業也

湘鄉陳名杰

唐仲雄 刊

王震球

門人曾紀霖襄校

門人曾士琮詳校

元書卷三十七

元書卷三十八

石抹明安劉伯林粘合重山史天澤列傳第十三

石抹明安桓州人也性寬厚不拘小節與人交灑如也初與耶律阿海同使北方得與太祖從容宴語還金後爲列校在招討使紇石烈九斤帳下太祖六年大軍破撫州將遂南向金主命九斤逆擊太祖之師遇於野狐嶺九斤因謂明安曰汝素識鐵木眞其往臨陣間以出師之名不然卽詬之明安初如所教俄策馬來降太祖命縛以俟旣敗金師召詰之曰汝何詬我而敢降也對曰臣素有歸志由爲九斤所使恐其見疑故如所言不然何由瞻奉天顏帝喜其對曰釋之命領蒙古軍撫定山後諸地明年帝圍西京不克欲舍去休兵於北明安進諫以爲兵貴神速語在太祖本紀帝

從其計遂留兵攻西京復命明安統師而南所至民皆具簞食壺
漿以迎明安因徇河北諸郡而還九年金主南遷汴在道扈從
軍作亂北還乞降太祖復命明安同三哥拔都將兵出古北口以
援弘農攻下景薊檀順諸州諸將議欲屠之明安奏曰此輩當死
今若生之則彼未附者皆聞風自至矣帝從之明安遂進兵合弘
農圍中都明年金右副元帥蒲察七斤以通州降明安駐兵京南
建春宮中都人皆兜懼金留守右丞相完顏福興遂以磬書告急
於汴金主遣左都監烏古論慶壽將大名河間之師復使御史中
丞李英收集義軍護餉以援中都明安自往迎之遇於永清命士
卒陽敗以誘之而回師與戰大破之斬李英獲糧千餘車遂克永
清未幾金監軍阿興鬆哥復以兵萬二千糧五百車將犯圍以入
中都明安復邀擊之於涿州宣封寨鬆哥死盡得其輜重尋復攻

萬甯宮克之轉取富昌豐宜二關攻拔固安縣於是燕南道絕完
顏福興遂仰藥死中都官屬父老繙素開門降明安慰之曰負固
不服以至此極非汝等罪守者之責也悉令安業仍以粟振之眾
皆感悅明安爲將以謀制勝尤務達人情當破順州解密雲主簿
完顏壽孫之縛禮而用之既而逸去復來問其故對曰有老父在
城中恐不能存謀歸侍養今已沒故來也明安慰而釋之其克中
都不事仰攻斷其援師中都自下平日雖祁寒盛暑未嘗不與士
卒均勞逸同甘苦及得金府庫珠玉錦綺明安悉具其數上進未
嘗以纖豪爲已有無武人貪戾之風帝時在涼涇聞捷加明安太
傅邵國公燕京行尚書省兼蒙古漢軍都元帥十一年薨於位子
曰咸得不

咸得不亦曰喊得不中都旣下明安命帥眾東取平州會史天倪

奉詔南征亦引兵至平州咸得不乃遣監戰提兵前進以州人黃
裳入城招降是時平州兵變殺元帥左都監烏林答乞住而推完
顏合達爲帥平州父老不欲就招合達知事勢不敵乃降咸得不
以合達歸燕明年明安薨咸得不襲職爲燕京行省遂令合達還
守平州其歲合達自拔浮海歸金爲史天倪所敗事具天倪傳咸
得不爲人粗狠性勇好利至孥人妻女取貨財及土田往往殺人
盈市又縱其親黨爲劇賊未夕輒曳牛車指富家財物盡傾其篋
笥不與則殺之於是諸勢家子輒效尤白晝剽掠會太祖連歲在
西域咸得不之惡無上聞者咸得不亦恃父平燕功氣張甚諸吏
莫敢過問也久之耶律楚材數推治然止禁其妄殺及誅盜魁而
已咸得不以楚材之抑深怨之欲陷楚材不能得楚材亦不厚責
也事具楚材傳咸得不竟以壽終

劉伯林濟南人也好任俠善騎射仕金爲威甯千戶太祖七年圍
威甯伯林知不能敵遂降太祖問在金何官對曰都提控卽以爲
都提控命選士編軍帥以從耶律禿花同任征伐旣招降山後諸
州而太祖久攻西京不下乃北還而留伯林屯兵天城以遏金人
伯林屢擊破金師進攻西京拔之錄功賜金虎符充西京留守兼
兵馬副元帥明年太祖復南下以降人四十六都統從伐金伯林
與焉進徇山東而還十年與克中都還軍舊屯十二年從國王木
華黎復徇山東以功賜錦衣名馬嗣從徇河北聞喜下時論欲徙
其民以實天城伯林以北地喪亂人艱於食力爭止之部曲所獲
俘虜萬計亦悉縱之是時太祖念漢人以土地歸莫先伯林重以
平西京功乃立二萬戶各總管漢軍而伯林爲之首復遷都元帥
十六年卒伯林自金時治威甯歸國復十年常務農積穀與民休

息故鄰境凋瘵而威甯獨爲樂土云後累贈太師秦國公謚忠順子黑馬

黑馬本名嶷字孟方生時家有白馬產黑駒故以爲小字後遂以小字行爲人沈勇有志畧弱冠隨父征伐大小數百戰畧無退懼嘗以一騎拔本部十三人於重圍出之由是知名太祖十七年襲職爲萬戶佩金虎符兼都元帥明年從木華黎攻鳳翔不克還屯絳州嗣國王李魯奉詔討西夏黑馬從破銀州而還太宗元年以漢軍日眾復增一萬戶爲三萬戶仍以黑馬爲首粘合重山史天澤次之俄充平陽宣德管軍萬戶僉太傅府事仍總管漢軍從車駕西破鳳翔拖雷太子自興元圖金敗其師於鈞州黑馬身爲前驅論功賜西錦良馬貂鼠衣會增立七萬戶復首黑馬未幾從破汴京賜繡衣玉帶遂會師蔡州滅金七年從太傅耶律朱哥進征

兩川屢敗宋師十三年詔授都總管萬戶並統西京河西陝西諸軍萬戶入覲帝慰勞之賜銀鼠皮三百爲質孫衣尋命黑馬巡撫天下察民利病黑馬有膽勇以世勳貴重甲一時墨吏皆憚其威嚴而未嘗恃繡衣之權肆行誅戮應州郭志全反詐誤者五百餘人黑馬惟誅其渠魁而已憲宗三年朝於六盤行殿帝以商州與宋境接數爲所侵乃命黑馬往守宋人遂斂兵不敢犯七年入覲先是嗣太傅買住議立成都制蜀上游黑馬請用其議以圖全蜀從之成都立就命黑馬管領新舊軍民大小諸務賜號也可脫烈是時世祖以皇弟奉詔專制漢地黑馬皆其屬也阿藍答兒鉤攷諸路財賦置局關中推集經畧宣撫官吏下及征商羅鍊備至日俟終局日入此罪者惟劉黑馬史天澤以聞餘悉誅之其威望足震羣小如此中統元年四川元帥明里火者握重兵居成都陰與

六盤渾都海合將應阿里不哥廉希憲商挺宣撫川陝因密使詣黑馬俾矯詔誅之明里火者遂爲所縛斬其子訴於朝世祖曰朕命也二年兼成都軍民經畧使瀘州被圍黑馬已屬疾猶親督轉輸不輟左右諫其少休黑馬曰國事方急以此死無恨尋卒累贈太傅秦國公謚忠惠子十二人元振元禮顯

元振字仲舉隨黑馬在軍黑馬徙鎮商州元禮攝萬戶時年方二十明於號令賞罰悉當諸宿將皆服焉既而黑馬還鎮元振從憲宗攻合州以爲先鋒城未拔而憲宗崩元振復還成都中統二年宋瀘州守將劉整密求欵附黑馬遣元振往受之諸將皆曰整無故而降不可信也元振曰宋權臣當國賞罰無章有功者往往以計除之此將士所以離心也且整本非南人而居瀘南重地事勢與李全何異整之誠降無可疑者臨行黑馬復戒之曰劉整宋之

名將瀘州又蜀之衝要也汝往事成則爲國家之利不成則效死乃其分也人臣報國遑爲一身慮乎元振領命至瀘整開門出迎元振棄眾而先下馬與整相見示以不疑明日請入城元振釋戎服從數騎與整聯轡而入飲燕至醉整心服焉獻金六千兩男女五百人元振以金分賜將士而還其男女未幾宋四川制置使俞興帥兵圍瀘州晝夜急攻城幾陷左右勸元振脫歸曰整本非吾人與俱死無益元振曰人以誠歸我我豈以急故棄之哉吾有死而已無多言也元振見事迫乃募善水者齋蠟書至成都求援權造金銀牌以賞有功自秋至冬食將盡元振又殺所乘馬以犒將士守益奮俄而都元帥紐璘以大軍至元振遂與整出城夾擊宋師興大敗走捷聞元振自陳擅造金銀牌罪帝甚嘉之賜錦衣白金入朝又賜黃金弓矢鞍轡無何黑馬卒元振起授成都軍民經

畧使至元七年例降爲成都副萬戶十一年命兼潼川路副招討使明年卒子緯襲職佩虎符復爲萬戶終陝西參知政事

元禮憲宗四年授金符爲京兆路奧魯萬戶中統四年遷興元成都等路兵馬左副元帥至元元年遷潼川路漢軍都元帥二年宋四川制置使夏貴帥兵五萬犯潼川元禮所領才數千人諸將登城望貴軍有懼色元禮曰料敵制勝在智不在力也乃出戰屢破之復大戰蓬溪自寅至未勝負未決元禮激厲將士曰此去城百里爲敵所乘則城不得入潼川非國家有矣丈夫當以死戰取功名時不可失也卽持長刀大呼突入陣將士咸奮遂大敗貴兵斬首萬餘級禽者逾千以功賜錦衣白金名馬金鞍轡弓矢遂立蓬溪寨元禮又奏嘉定去成都三百六十里其間舊有眉州城可修復屯兵以扼嘉定之衝帝命平章政事趙璧往視或言荒廢已久

立之無關利害徒費財力元禮力爭之璧是其議遂興役七日而畢宋人駭其速元禮守眉五年召入朝因乞養從之九年起授懷遠大將軍延安路總管卒初夾谷常哥與伯林來降

夾谷常哥女眞人太祖命同伯林守威甯旣而金以大官餌令歸常哥縛其使以聞擢萬戶招討使命假權宜行事卒贈龍虎衛上將軍定襄郡公謚貞敏子龍古帶襲萬戶從木華黎戰山東河東又從拖雷太子戰鈞州又從達海紹卜征蜀龍古帶至興元因言其形勝宜戍守太宗卽以爲都元帥兼安撫使官之其後定宗命龍古帶行省興元龍古帶爲治城隍廨宇教民墾灌收用羣盜豪傑宋人驍毅亦俱來集是時宋制置使余玠圖取興元預使燒絕棧道以斷援師而以大軍圍而攻之龍古帶晝夜拒守又使人從間道導都元帥土薛來援汪德臣兵亦至余玠乃解圍還憲宗多

其功下詔褒美命軍帥皆受節度焉又與劉黑馬同立成都中統時請以子堅賢嗣致仕卒於興元贈榮祿大夫沔國公謚忠靖子八人堅賢官河南江北右丞餘亦多至大官

粘合重山金貴族也金史曰粘割氏國初爲質子知金將亾遂委質焉太祖賜畜馬四百匹使爲宿衛官必閭赤從平朔漠西域諸國方圍涼州執大旗指揮諸軍手中流矢不爲動也太祖立漢軍二萬戶以劉伯林重山爲之太宗時益以史天澤爲三萬戶分守中原重山軍於燕旣以爲侍從官數得侍宴時太宗嗜酒重山諫曰臣聞天子以天下爲憂未有不治忘憂未有能治者也置酒爲樂此忘憂之術非所以治天下也帝奇其言中書省立以重山爲左丞相七年詔從曲出太子伐宋同楊惟中行中書省於軍前師入宋境江淮州邑得降人三十餘萬重山取定城天長二邑不戮

一人歸還復視事中書賜中廄馬十珠袍一薨贈太尉魏國公謚忠武子南合

南合累官江淮安撫使太宗十年命嗣行軍前中書省事昭慈皇后稱制之四年大將察罕圍壽春七日始下欲屠其城南合不從由是獲免旣而世祖伐宋軍過汴南合啟曰李璮坐制一方受恩二世然其人多詐叛無日矣世祖亦患之中統元年以爲西京宣撫使明年拜右丞行中興省事三年李璮反帝使告南合曰卿言猶在耳璮果反矣卿宜謹守西鄙對曰臣謹奉詔不敢以西鄙爲陛下憂旣而興元判官費寅以私怨誣川陝行省廉希憲商挺訴於朝帝命南合往代希憲並讞其獄南合覆驗無實遂白其誣譖言不行至元元年進平章政事二年以例罷四年復平章政事未幾薨贈魏國公謚宣昭子曰博溫察兒知河中府

史天澤字潤甫天倪弟也家世具天倪傳天倪帥真定以天澤爲帳前總領天澤爲人宏毅身長八尺音如洪鐘勇力絕人軍中皆愛服之太祖二十年天倪遣護其母往從其父秉直於北京而天倪遂爲武仙所害是時天澤方行至燕府僚王縉王守道追及之謂曰變起倉卒部曲散走多在近郊君能回轡不招自至矣天澤泣然曰兄弟之仇不共國雖死當行況未必死乎卽傾貲裝易甲仗南還次滿城果得士馬甚眾天澤攝行軍事遣人詣國王李魯言狀且乞濟師李魯卽承制命襄兄職爲都元帥而遣肖乃台將蒙古軍三千人援之合攻中山斬仙將葛鐵槍中山下遂分兵畧無極復拔趙州以遏其南竄而進軍新樂至野臺天澤兄天安師亦至仙戰敗奔雙門遂復真定未幾宋大名總管彭義斌帥師來援仙天澤及肖乃台扼諸贊皇李里海亦以兵來會義斌勢蹙焚

山自守天澤遣銳卒摧其鋒而自以鐵騎繼其後遂縛義斌斬之仙復令諜者結死士於城中爲內應夜斬關入據其城天澤踰城東出至橐城求援於董俊俊授以銳卒數百夜入真定而肖乃台亦來赴捕叛者三百餘人仙從數騎走保獲鹿抱犢砦天澤急追破之仙遁入汴天澤遂招集流散存恤窮困真定始定矣太宗元年議立三萬戶分統漢軍天澤爲真定河間大名東平濟南五路萬戶是時金以武仙置府衛州明年天澤合諸軍圍衛金將完顏合達帥眾援仙完顏陳和尚先進陷陣蒙古諸軍敗天澤獨以千人繞出其後軍乃復合遂克衛州四年天澤畧地京東復與肖乃台合軍斬金將完顏慶山奴於楊驛店明年金主親攻衛州天澤還救與守兵夾擊金師大敗之金主遂奔歸德復遷蔡天澤從塔察兒圍蔡金亡復從曲出太子及口溫不花大王伐宋師出淮漢

所向輒克憲宗二年入覲上多其功賜衛州五城爲之食邑世祖是時專制漢地憂河南之不治也乃請以天澤及楊惟中趙璧爲經畧使興利除害民獲蘇息八年詔從伐蜀明年帝圍合州宋將呂文德來援壞涪州浮橋以入都元帥紐璘等戰不利文德徑上嘉陵江天澤分軍爲兩翼跨江注射而親帥舟順流縱擊三戰三捷奪其戰艦百餘艘追至重慶而還是時天澤年五六十矣厯事數朝自四十始折節讀書竟通通鑑治軍撫民威惠大著久益深厚嚴重遂有公輔之望中統元年世祖卽位首具疏言朝廷當先立省部以正紀綱設監司以督諸路需恩澤以安反側退貪殘以任賢能頒祿俸以養廉禁賄賂以防姦庶能上下不應內外休息授河南宣撫使兼江淮諸翼軍馬經畧使明年帝訪賢才於竇默默舉天澤及許衡語在默傳帝卽拜天澤右丞相時立省規十條

以正庶務天澤所定也三年李璮反合必赤大王總督諸軍討璮復命天澤往節度各軍天澤聞璮入濟南笑曰此豕突入艹也至則謂合必赤曰璮多譎而兵精不宜力角當以歲月斃也合必赤深然其議遂築環城圍之逾數月城中食盡而潰生禽璮誅於軍門益都亦開門迎降山東平然言者因是遂言宜削諸侯權天澤奏曰此當自臣家始也於是史氏解兵符者十七人至元三年改樞密副使是時副使爲院長官貳燕王治樞密院者也四年又爲左丞相明年復爲樞密副使六年詔與駙馬忽刺出董師襄陽至則督諸將相要害立城堡作爲長圍期在必取尋以疾還八年加開府儀同三司平章軍國重事尋復視師十年襄陽平明年大舉伐宋詔與伯顏並爲左丞相總大軍水陸並進至郢州疾作召還至真定薨遺奏曰臣大限有終死不足惜但願天兵渡江慎勿殺

掠語不及他帝聞震悼厚賙之贈太尉謚忠武累贈太師鎮陽王立廟天澤敢任大事不畏艱險然平居欲然未嘗矜伐以史氏一門鼎盛在太宗憲宗世累辭榮寵拜相之日門庭悄然或怪其避權天澤曰君不聞韋澳告周墀語乎在中書每事輒讓同官曰天澤武人何堪負荷庶務未安稍得通譯其間耳其節度諸將討李璮也帝臨軒授詔然天澤至軍亦不以詔示人凱旋悉歸功諸將焉以是眾多其謙退而服其忠上不疑而下無怨云子八人格樟棣杠杞梓楷彬樟眞定順天新軍萬戶棣衛輝路轉運使杠湖廣右丞杞淮東道廉訪使梓同知澧州楷同知南陽府彬左丞

格字晉明憲宗時爲河平節度使憲宗崩格在謙州阿里不哥自立於和林五歲不得還至元元年以爲鄧州舊軍萬戶徙亳州從下襄陽賜白金衣裘弓矢鞍馬平章政事阿朮將二十三萬戶渡

江每五萬戶擇一萬戶爲帥格其一焉是時宋將程鵬飛扼江而守格軍先渡爲所卻格被三創喪其卒二百尋復大戰格中流矢鵬飛亦被七創乃敗走樞密院欲論以輕進罪帝念其功不問也旣而從右丞阿里海牙拔潭州詔卽留戍授安撫使賜以天澤所服玉帶復從攻靜江力戰克之初靜江溪洞諸蠻皆遣使附於雲南格至諭之來赴者五十州雲南爭之詔以屬格尋遷廣西宣撫使進宣慰使宋益王立於海濱因傳檄詐言夏貴已復江鄂諸戍將恐江路遂絕皆託計事欲北還格曰君等乃恍於虛聲耶貴若果踰嶺吾取道雲南以歸未晚也時行省議棄肇慶併兵守梧州格不可更增兵戍之久之降橫象賓貴之賊援汪澤民於永春漕欽廉高化之糧以濟雷州走張世傑遂移戍雷州宋平還格鄧州萬戶拜參知政事行廣南西道宣慰使遷湖廣右丞徙江西進湖

廣平章政事要束木與同列數有匡正卒官湖廣人追思之子焜
育從兄權子官福建平章政事大司農謚義襄後生子榮襲鄧州
舊軍萬戶其時任真定新軍萬戶者曰張興祖

張興祖中山無極人也父林趙州觀察使以兵屬史天澤爲千戶
卒興祖襲職從史權戍鄧州會宋兵鈔新野西港興祖追及於榜
柵潭奪所鈔還然受重創馬顛復騰上不知左股之折也久之方
平又破宋人於白河口尋大軍下襄樊及南伐平江漢興祖皆與
焉戰楊邏堡矢汰其左臂然生獲宋將鄭信還既而阿里海牙留
鎮鄂使興祖守漢陽興祖欲前戰而辭守阿里海牙諭慰之乃往
戍復從阿里海牙破高世傑降高達尋西圍潭州三月不下興祖
曰礮之而可以肉薄登也潭州遂拔又進收衡永全桂陽諸州又
從拔靜江既而湖南諸州復叛阿里海牙曰此皆汝所畧定也當

討之興祖遂還戮其渠而降其黨遷招討使監歸州又監常德尋
西征亦奚不薛降之賜衣服弓矢鞍勒興祖積功爲真定新軍萬
戶以始從史氏起真定也又以勇賜名拔都至元中詔萬戶各解
使職興祖遂罷招討使以萬戶將真定新軍戍衡州卒興祖猛鷺
好射虎常拔生虎鬚欲以已風人呼之殺虎張云子九人曰忠顯
戰通城沒於宋官其子回世特爲千戶曰史閻瑞州萬戶曰鵬翼
嶺北湖南道提刑按察使僉事曰荅刺赤襲真定新軍萬戶仍戍
衡州興祖旣卒荅刺赤將歸葬先塋而省稽故事武臣無喪葬之
文止不得行荅刺赤竟窆而還人以是孝而壯之又從天澤征戰
者曰李進

李進保定曲陽人也初從張柔屯三叉口爲百戶憲宗西征史天
澤選驍桀從行得進其時方由陳倉入興元度米倉關地荒塞不

通進伐木開道七百餘里至七星關關有連堡巴渠江環堡東流天澤命進往關說降宋人不應進潛視閒道白天澤夜取之關路遂通明年憲宗在釣魚山宋人盛陳舟師黑石峽帝立馬東山佇望天澤令眾視旗鼓東指宋人遂潰走帝指謂諸將曰白旗下服紅半臂突而前者誰也天澤以進對賜錦衣名馬世祖時從征李璮及平宋遷千戶賜金符數年命屯田別失八里與海都篤哇戰淇水山被獲至昌八里遁還至火州收集潰卒還京師賞金織紋衣及鈔累授左翼屯田萬戶元貞元年卒子斐嗣延祐中仁宗念其父北征被掠特賜鈔恤之泰定元年以疾辭子朵兒只襲

論曰明安一言而成太祖南伐之心自是金不能少紓以保境矣伯林首定西京盈科後進功豈在克燕下哉重山天澤均以功相重山之諫沈湎粹乎有道之言抑何其深至也天澤自名武人深懷退讓然其器足以勝之矣竇默之深許不亦宜乎

門人曾鞏其美

門人曾鞏其美

湘鄉陳士璋

門人李光朝 刊

衡陽劉伯尊

門人曾廣基襄校

門人曾士琮詳校

